

NGIME EMNYANGO

FUTSI NGIYANCONCOTSA

2  ...?...futsi Usisindzisa esonweni. Futsi manje sitofundza sihloko lesincane nje, futsi sikhulume nani imizuzwana lembalwa eVini laNkulunkulu. Ngoba, empeleni, leyo yincenye leyenele konkhe, Livi. “Kukholwa kuta ngekuva, kuva Livi laNkulunkulu.”

3 Manje asikhotsamise inhloko yetfu umzuzwana nje ngaphambi kwekutsi sivule Livi laKhe.

4 Nkhosi lenemusa kakhulu, siyajabula manje ekuseni ngalenhlanhla lesinayo yekuma eBukhoneni baKho, sibuke etulu kuWe, futsi siKubite ngaBabe wetfu. Uma sikhumbula emiBhalweni yetfu, kutsi Wena utsite, “Khulekani nine, ‘Babe wetfu LoseZulwini.’” Kwati kutsi sonkhe asisimsulwa. “Satalelwa esonweni, sabunjelwa ebubini, futsi seta emhlabeni sikhuluma emanga.” Nalolusizi lolukhulu njengatsi, futsi, noko, ngeNgati yeNdvodzana yaKho, iNkhosi Jesu, ngemusa longakafaneleki lesiniketwe wona, sinenhlanhla yekubuka etulu futsi sitsi, “Babe.” O, siKubonga kanjani ngaloku!

5 Futsi, namuhla, besingaKucela, Nkhosi, kutsi usihlole tinhlitiyo tetfu njengoba sisakhonta. Asiteli lenye inhloso lapha kodvwa kuKukhonta. Nekubona, kulolusuku lolukhulu lesiphila kulo manje, lapho, kubonakala kwangatsi, kutsi yonkhe intfo yehlulekile. Kodvwa yinye intfo lecinisekile lengeke yehluleke, lowo nguJesu. Ngoba Watsi kitsi, ngesikhatsi Asemhlabeni, kutsi, “Emazulu nemhlaba kutawendlula, kodvwa emaVi aMi angeke ehluleke.” Siciniseko lesinje pho lesinaso, ke, kumphumuta siphetfo semphefumulo wetfu saPhakadze etikweLivi laKhe!

6 Futsi manje, kungiko, Kunikwe tsine, esimeni seNcwadzi lebitwa ngeliBhayibheli, wati kutsi Kwakubhalwe nguMoya loyiNgewe, futsi kungahunyushwa kuphela nguMoya loyiNgewe, kwangatsi Angeta manje kuleliVi lelibhaliwe, futsi akhulume ngetindzebe temuntfu lofako, etindlebeni letisatokufa, futsi anikete kucondza kwaPhakadze. Siphe kona, Babe, kute kutamatise tinhlitiyo tetfu, kutsi tiMtsandze kakhulu. Nekuba nenhlanganyelo lencono naYe, kusiletsa esidlweni senkhosi lesionsondzele.

7 Khona-ke, besingaKucela, manje ekuseni, Nkhosi, kutsi banengi labagulako nalabadzingile lapha ebandleni nasemhlabeni wonkhe. Kwangatsi singemukela tinxuzo tekulwa kwaKhe kwemtimba waKhe, ngetulu kwetfu namuhla, ngoba kubhaliwe, kutsi, “Yalinyatwa ngenca yetiphambeko tetfu,

ngemivimba yaYo siphilisiwe tsine.” Futsi njenga Davide wasendvulo wamemeta kakhulu, “Yibonge iNkhosi, O mphefumulo wami, futsi ungakohohlwa yonkhe imisebenti yaKhe lemihle; Lotsetselela bonkhe bubi bakho; Lophilisa tonkhe tifo takho.” Siphe, namuhla, Nkhosi, kutsi kulokukhonta loku, kutsi wonkhe umuntfu lapha lonesidzingo sanoma yini, insindziso yemphefumulo wabo, noma kuphiliswa kwemtimba wabo, kwangatsi singadvonsa tinzu zo talomhlatjelo lomkhulu lophakeme namuhla.

⁷ Sitinikela kuWe manje, Nkhosi. Futsi sikhulekela kutsi Utokhuluma ngatsi, futsi utova ngatsi, futsi uphendvule umkhuleko. Ngoba sikucela eGameni leNdvodzana yaKho lebusisiwe, iNkhosi Jesu uMsindzisi wetfu. Amen.

⁸ Kunalokunengi kakhulu lokuhle eVini laNkulunkulu, sekuze kube yintfo lelukhuni kunoma ngubaphi bantfu kutsi bake bakhets'e umBhalo lotsite. Uma ngifundza Livi, ngitotsi, “Loku kuvakala kahle kakhulu, ngitokudvwebela nje. Bese-ke uma ngiya enkonzweni lelandzelako, ngitoshumayela *ngalesifundvo*.” Futsi ngitohlala phansi imizuzwana lembalwa, futsi ngilalele uMoya njengoba Ukhuluma. Khona-ke angeke kodvwa kubesikhatsi lesidze, ngize ngibe ngulochubeka nekufundza kakhudlwanyana, futsi ngitotfolu lokutsite lokuvakala kancono kakhulu. Futsi ngitokudvwebela loko, futsi ngitsi, “*Nguloku lengitokhuluma ngako, uma ngiya enkonzweni lelandzelako.*” Futsi i-intfo yekucala loyatiko, liBhayibheli lami limakwe netintfo letitsite lengitokhuluma ngato uma ngiya enkonzweni.

⁹ Ilunge kanjalo-ke iNkhosi, nekutsi Livi laYo liligugu kanjani kulabangewe baYo. Futsi inhlanhla lenkhulu kangaka pho lesinayo namuhla, kuleli-awa, futsi lapho kubonakala kwangatsi onkhe ematsema aphelile, kodvwa noko kutfola sinye lesicinile, sisekelo lesicinisekile, lelo Livi.

¹⁰ Bekusekwenhlitiyo yami etinsukwini letimbalwa letendlulile, njengoba ngitjele uMnaketfu Neville, noma ngitfumele livi kuye, ngaDzadzewetu Wood, kutsi bengitokhuluma manje ekuseni ngekutsi *Umbhalo Wesandla EluBondzeni*. Kwakungumlayeto iNkhosi leyanganika wona esitimeleni, ngibuya ngivela eCalifornia. Kodvwa emlayetweni, wawutanyatanyiswa kakhulu, neli-awa lelinjalo, kwaze kwatsi, kushiya bantfu...kutfola tintfo letinkhulu, ngisho nakulesiputniki sesimodeni leniva kakhulu ngaso, sembulwa eVini laNkulunkulu. Nekubona leli-awa lesiphila kulo, impela sisekugcineni. Bese-ke ushiya bantfu bakulesosimo, bese-ke ngaphandle kwekuletsa lomunye uMlayeto kutsi uwulandzele, kuniketa ematsema eBandleni, bese-ke kushiya bantfu batsi kutibuta, futsi kubente bashaywe luvalo.

¹¹ Ngako ngicabange kutsi ngitolindza kute kube liSontfo lelitako, ngibuya, bese-ke ngikhuluma nge-*Umbhalo Wesandla*

EluBondzeni, ngeliSontfo ekuseni. Bese-ke ngeliSontfo ebusuku, ngikhulume ngekutsi, “Kuhlwitfwa kweliBandla ngaphambi kwekuHlupheka lokukhulu.” Bese kutsi-ke uma letintfo leti tisondzele kakhulu edvute, khona-ke luHlwitfo lusondzele kakhulu kunaloko lolungiko, uma liBandla lingena ekuHlu-...ngaphambi kwekuHlupheka lokukhulu. Ngako, nginesiciniseko kutsi niyacondza kutsi Liyakwenta.

¹² Manje ngifuna kufundza eNcwadzini yeSambulo, esahlukweni se 3, mayelana nelibandla lalolusuku. Nelivesi le 14, ngitawufundza, ngicale. Tambulo 3:14.

Nasengelosini yelibandla laseLawodisiya bhala kutsi; Naku lakushoko Amen, fakazi lowetsembekile nalocinisile, kucala kwalokudaliwe kwaNkulunkulu;

Ngiyayati imisebenti yakho, ... wena awubandzi futsi awushisi: Bengingatsandza kube bewubandza noma ushisa.

Ngako-ke ngoba usivuvu, futsi awubandzi noma awushisi, Ngitakukhafuna uphume emlonyeni wami.

Ngoba wena utsi, nginjingile, futsi ngandzisile etimpahhleni, futsi angikesweli lutfo; kantsi awati kutsi ungelolusizi, ... wekuhawukelwa, ... lophuyile, ... lophumphutsekile, nalongcunu:

Ngiyakweluleka kutsi utsenge kimi ligolide lelihlantwe ngemlilo, kuze wena ungahle unjingie; nengubo lemhophe, kute wembatse, nekutsi lingabonakali lihlazo lakho lebungcunu bakho; nekutsi ugcobise emehlo akho ngemutsi wemehlo, kuze ubone.

Bonkhe leNgibatsandzako, Ngiyabasola ngibajezise: ngako-ke shisekela ke, uphendruke.

Buka, Ngime emnyango, futsi ngiyancconcotsa: uma umuntfu eva liphimbo lami, futsi utovula umnyango, ngitongena kuye, futsi ngidle naye, naye adle nami.

¹³ Manje lelovesi lema 20 kulapho la ngifisa kutsatsa khona sihloko, kubona kutsi Nkulunkulu utosinika yini ingcikitsi: *Ngime EMnyango Futsi Ngiyancconcotsa.*

¹⁴ Wonkhe loMlayeto manje ekuseni, lesisandza kuwufundza nje, ngemaVi aKhristu cobo lwaKhe, emvakwekuvuka kwaKhe, akhuluma emnyakeni welibandla wekugcina. Njengoba sicondza, kwakunemabandla lasikhombisa ngalolosuku, emabandla lasikhombisa ase-Asiya. Ngamunye wabo bekanengelosi, naletotingelosi tatfunyelwa kuhola lamabandla lawa kusukela phansi emnyakeni. Futsi manje sesiphetsa emnyakeni welibandla wekugcina, iLawodisiya.

¹⁵ Futsi akukejwayeleki kakhulu kubona kutsi lentfo ishaya kanjani manje ekuseni, kutsi kuphatselene kanjani nalelibandla lalolusuku, kubona timo talesivuvu, nekungabinandzaba

ebandleni. Nekutsi bakusho kanjani loko kutsi, “O, siseluhlelweni lolukhulu. Sakha libandla lemadola lasigidzi. Nelibandla letfu liyaphumelela. Sinemalunga lamanengi kunaloko lesake saba nawo. Umelusi wetfu uholelwa kancono. Futsi sincono, ngako konkhe.” Uma loko kungesiko kubita kwelusuku!

¹⁶ Kodvwa, noko, liBhayibheli latsi, “Ungcunu, uphuyle, ulusizi, uphumphutsekile.”

¹⁷ Cabangani nje, uma umuntfu angcunu, phindze aphuyile, futsi alusizi, phindze aphumphutsekile, futsi angakwati loko. Manje, kube bekakwati, bekatotama kutentela kancono. Bekatophutfuma esuke esitaladini kutsi atfole timphahla. Bekayotama kutenta ncono. Kodvwa uma akulesosimo futsi angati, intfo lembi kabi kanje pho! Manje, futsi ebusweni bako konkhe... Leso akusiso sihloko sami.

¹⁸ Jesu watsi, “Ngime emnyango ngiyancocotsa. Futsi uma noma ngumuphi umuntfu atovula umnyango, Ngitawungena kuye, futsi ngidle naye, naye adle naMi.” Simemo lesinje pho ku—kubantfu labaphila kulolusuku! Kubona loku lokubi kakhulu lesikubukako manje! Nangesimemo lesiyinkhatimulo kangaka, “Ngitokuma emnyango futsi nginconcotse. Futsi uma umuntfu eva, futsi avule, Ngitawungena kuye; futsi Ngitawudla naye, naye adle naMi.” Sidlosenkhosi lesinje pho! Inhlanhla lenje pho! Inhlanganyelo lenje pho! Ume emnyango, anconcotsa!

¹⁹ Ngesikhatsi umdvwebi lomkhulu... Angikhoni kubita ligama lakhe nje kulesikhatsi lesi. Wadvweba sitfombe saJesu anconcotsa emnyango. Noma ngusiphi sitfombe, ngaphambi kwekutsi sibe sitfombe lesidvumile, sifanele sendlule ehholeni lebahlatiyi, la—abantfu lababadvwebi labadvumile labahlatiya lesitfombe. Batfola konkhe lokuliphutsa lokukuso. Ngako emvakwekuba lesitfombe lesi lesidvumile sesendlule kahle ehholeni lebahlatiyi, kwabutwa lendvodza leyaniketa lomdvwebo. Umhlatiyi watsi, “Kunentfo yinye nje lengingayitfola lengakalungi esitfombeni sakho.” Watsi, “Ukhohliwe kubeka sibambo emnyango.”

²⁰ Nalomdvwebi watsi, “O, cha. Anicondzia kahle. Kube lesibambo besingephandle, Bekatophakamisa lesibambo futsi angene. Kodvwa sibambo singekhatsi; lomuntfu longekhatsi ufanele aphakamise lesibambo.”

²¹ Nguleyondlela lokungayo. Jesu, ngaso sonkhe sihawu saKhe nako konkhe kweluelo lwaKhe, noko nguwe umuntfu lotoMvumela angene noma uMgcine angephandle. Sibambo singalapho ngakuwe.

²² Umuntfu bekanganconcotselani emnyango walenyi indvodza na? Bekungaba yini sizatfu na? Ngani, kufuna kungena. Ufuna kungena. Ufuna, unalokutsite lafuna kukhuluma ngako, noma lokutsite kukukhombisa, uma lomunye

anconcotsa emnyango wakho. [UMnaketfu Branham unconcotsese epulpiti—Umhl.] Bafuna kuzuza indzawo yekungena, noma inhlanganyelo lencane, noma intfo letsite kukhulumna nawe ngayo. Kungalesosizatfu Jesu anconcotsa emnyango.

²³ Bewungacabangani, kutsi kusukela phansi emnyakeni, lokubita lokunengi lokufike emnyango webantfu na? Asibuyeleyemuva kwemizuzwana lembalwa nje.

²⁴ Ake sicabange ngaKhesari Augusta lomkhulu etinsukwini tembuso wemaRoma. Kube-ke lisotja letinyawo beliloku liphila entansi emkhukhwini lomncane ndzawanatsite, naKhesari Augusta bekatovela esigodlweni sakhe, futsi wehlela emkhukhwini lomncane lapho indvodza yetinyawo beyihlala khona, futsi wanconcotsa emnyango na? Intfokoto lengaka bekungaba ngiyo kulendvodza yetinyawo! Ngani, umbusi lomkhulu waseRoma bekasemnyango wayo, etama kukhulumna naye. O, bekayojabula. Bekayovula umnyango futsi awe ngebuso bakhe, futsi atsi, “Umbusi lomkhulu, ngena ekhaya lami lesihlupheki. Futsi noma yini loyibonako loyifunako, yakho.” Impela, bekayotfokota kutsi abe ne—nenhlanhla lenkhulu yekujabulisa umbusi waseRoma ngelusuku lwakhe.

²⁵ Kwakuyoba yinhlanhla lenkhulu kanjani pho, etinsukwini ta-Adolf Hitler ejalimane, Umcindzeteli waseJalimane! Kube bekehlele endlini yemuntfu tatane, futsi bekanconcotsse emnyango, nalendvodza yayitakuya emnyango futsi iphakamise likhethini futsi ibuke. Futsi Umcindzeteli waseJalimane, Hitler lomkhulu, bekeme emnyango wakhe; umbusi, ndlovu kayiphikiswa waseJalimane. Bekayotsi, “Yebo-ke, angikafaneli kutsi indvodza lenjalo inconcotsse emnyango wami. Ucondze kutsi Hitler ufunakukhulumna nami, umuntfukatana na?”

²⁶ Ngani, bekayowuvula umnyango awutsi gedvu, futsi awe ngebuso bakhe, futsi atsi, “Hitler, ngena ekhaya lami. Impela. Noma yini lelapha yakho, uMcindzeteli lomkhulu waseJalimane.” Impela, bekayojabula kukwenta. Hhayi loko kuphela, kodvwa bekatohlonishwa kutsi ukwentile, kucabanga kutsi Hitler bekatofika emnyango wakhe.

²⁷ Futsi ufanele ubukisise bumcoka bemuntfu lonconcotsa emnyango wakho. Loko kuphatselana nako. Kube bekungulophila ngekucela, ungahe ube nelilungelo lekuvala umnyango, noma ungayi emnyango; uma beningenalutfo lenitomnika lona, futsi nitivela kabi ngalolophila ngekucela. Kodvwa uma bekangumuntu lomcoka...

²⁸ Bengingatsi, namuhla, uma—uma uMengameli Dwight Eisenhower ete lapha entasi ejeffersonville, namuhla, futsi wanconcotsa emnyango wanoma nguliphi lidemokhrathi lelihle, bewuyotivela uhhlonishwe kakhlulu kuya emnyango futsi wemukele uMengameli Eisenhower. Naloku nje wehluka kuye, kutembusave, impela bewungamtifikotela anconcotsa

emnyango wakho. Ngoba kungani na? UnguMengameli wase-United States. Uyindvodza lebaluleke kakhulu. Futsi naloku nje wehluka kuye, kutembusave, bekungaba kuhlonishwa kunoma nguliphi lidemokrathi, kulelidolobha noma nguliphi lelinye lidolobha, kutsi lingenise uMengameli Dwight Eisenhower, ngenca yebumcoka bakhe njengeMengameli wase-United States. Uyindvodza lenkhulu, indvodza lehloniphekile, futsi inesikhundla lesihloniphekile.

²⁹ Kungasikadzeni nje, kusuka eNgilandi, kufika indlovukazi. Yenyukela eCanada. Ivakashela onkhe iCanada. Yabese-ke ita e-United States. Futsi bekungeke kubekhona umuntfu e-United States ngaphandle kwalobekangajabula uma leyondlovukazi yayitobavakashela.

³⁰ Benitocabangani manje ekuseni, uma iNdlovukazi yaseNgilandi, naloku nje beningesiso lesinye setikhonti tayo, usisebenti saseMerica, kodvwa, naloku nje, kubekke bekanteta futsi anconcotse emnyango wakho ke? Futsi benitobona emantfombatane akhe, nakanjalonjalo, eme lapho. Futsi bekayotsi, “NgiyiNdlovukazi yaseNgilandi. Ngitele kutokuvakashela.” Kuhlonishwa lokunje pho lokwakuyoba ngiko, ngenca yebumcoka bakhe. Uyindlovukazi. Futsi lenye yetindlovukazi letinkhulu kunato tonkhe emhlabeni yiNdlovukazi yaseNgilandi. Noko, ute emandla kulesive lesi. Kodvwa ngoba umcoka, ungajabula kumngenisa. Bengingajabula kumngenisa, kwati kutsi benginelitfuba lelihle nekuhlonishwa kwekjubulisa iNdlovukazi yaseNgilandi.

³¹ Kodvwa, o, Jesu uyokuma emnyango anconcotse, futsi siyoMgcina angephandle. Singeke sivule umnyango. SitoMyekela nje anconcotse. Futsi ngubani lomcoka kakhulu kunaJesu na? Ngitjele kutsi ngubani umuntfu lomkhulu kunaYe. Futsi lapha Utsi, “Ngime emnyango, ngiyancconcotsa; futsi uma noma ngumuphi umuntfu atovula, Ngitongena.”

³² Kube bewunabo bonkhe baKhesari, bonkhe bakaHitler, bonkhe besilisa labakhulu nebesifazane belive beme embikwemnyango wakho, bewungeke ube ngisho namunye, bonkhe bahlanganiswe ndzawonye, kungeke kucatsaniseke ngalutfo naLowo loma emnyango, malanga onkhe, futsi unconcotsa enhlitiywensi yakho: iNkhosi Jesu. Ufuna kungena. Ufuna kukhuluma nawe. Ungulomunye wetikhonti taKhe. Wentiwa ngemfanekiso waKhe. Usidalwa lesingumuntfu lesentwiwe ngemfanekiso waNkulunkulu. Futsi Ufisa kukhuluma nawe. Akayi nje kulabakhulu, umuntfu lodvumile. Uta kulabaphuyile nalabadzingako. “Noma ngumuphi umuntfu loyova liPhimbo laMi, futsi avule umnyango, Ngitawungena futsi ngikhulume naye.”

³³ Cabangani nje kutsi kuchaza kutsini manje ekuseni: Ngoba iNkhosi yeNkhatimulo. Ngoba NGINGUYE lomkhulu.

Ngoba Lowo Lobekasesihlahleni lesivutsako. [Akucoshwanga etheyiphini—Umhl.] Ngoba Lowo Lowehlukanisa emanti eLwandle loluBovu, kutsi bantfwana baka-Israyeli bendlule. Noma Lowo Lowakhulumna nelilanga lema lathula. Lowo Lowenta inyeni netinkhanyeti, futsi watifaka etikhaleni tato, kutsi tikhanye. Lowo Lowatsi, “Lazaru, phuma,” nemuntfu, afile, tinsuku letine ethuneni, waphila futsi. Kucabange nje! Lowo Lowangena emgodzini wemabhubesi naDanyela, futsi wamvikela emabhubesini. Lowo Lowangena esithandwemi semlilo, nebantfwana bemaHebheru, futsi waphephetsa umlilo kubo. Lowo Lowema wase utsi, “Ngikuvuka nekuPhila. Loyo lokholwa ngiMi, noma besafile, noko utawuphila. Nomangubani lophilako futsi akholwe ngiMi angeke afe.”

³⁴ Ume emnyango webuntfu lobuwile, uyaneconcotsa, futsi utama kuzuza umphefumulo. [UMnaketfu Branham unconcotsse epulpiti—Umhl.] Futsi sesimencabile lowoMuntfu lomkhulu nalomcoka.

³⁵ O, wena utsi kimi, ke, “Mnaketfu Branham, ngiyehluka kuwe khona lapha, ngoba sengivele ngiMvumele wangena.”

³⁶ Yebo-ke, loko kuhle kakhulu. Ngijabula kakhulu kutsi nente loko, niMvumele angene. Kodvwa, ke, niyati kutsini? Kubonakala ungatsi emvakwekutsi niMvulele angene emnyango, ninencumb yemakamelo lamancane—lamancane enhlitiywени yenu. Futsi nitoMemukela emnyango, “Vele ume khona lapha, kodvwa ungabuki ngalapha endlini yami.”

³⁷ Ungake ucabange nje utjela Umcindzeteli kutsi bekangangena, kodvwa angeke abuke ngale kwendlu na? “Manje, Mcindzeteli, ungema lapha emnyango, uMnumz. Hitler, kodvwa awubuki *kulelikhabethe*. Ungabuki *ngalapha*. Nginetimfihlo letincane lengingafuni kutsi wati ngato.”

³⁸ Nguleyondlela tsine, ngaletinye tikhatsi, lesitibita ngemaKhristu, siphatsa Jesu ngakhona. “Ungangena. Yebo, ngiyakhholwa kutsi UyiNdvodzana yaNkulunkulu, kodvwa ungake ufake likhala lakho emsebentini wami.” Niyabona na? Lelo lilayini leliyingoti. Ninetindzawo letincane enhlitiywени yenu, iminyango lemincane lengena emakamelwени lamancane layimfihlo enhlitiywени yakho. EmaKhristu anako loko. Futsi labanengi labavumela Jesu angene, abatsandzi kuvumela Jesu abe nendlela yaKhe. Akakemukeleki ngako konkhe.

³⁹ Uma ngita endlini yakho, futsi ungemukele ngingene, ngiva kwangatsi ngingumnakenu. Futsi ngingaya noma ngukuphi lapho ngifuna kuya khona, uma ngemukeleke sibili, uma ngita endlini yakho. Ngiva kwangatsi uma utsite, “Wemukeleleki,” loko kuchaza kutsi ngemukeleleki noma kuphi endlini. Ngitawuvele nje ngingene ngekhatsi. Uma ngifuna kulala sikhashanya, ngitawuya ngekhatsi egumbini lekulala.

Futsi uma ngifuna ku—kudla sikhashana, ngitoya ekhishini. Ngingativela nje kwangatsi nginekwemukeleka.

⁴⁰ Futsi uma-ke uta endlini yami, noma mine endlini yakho, futsi utsi, “Manje, ungema khona lapha, kodvwa ungake ulokotse uvule *lowomnyango*. Ungayi *lapha*”? Beningeke ngemukeleke kakhulu.

⁴¹ Yebo-ke, nguleyondlela lokungayo namuhla ngebantfu labatibita ngemaKhristu. Wena utsi, “O, ngiwalelibandla lela.” Loko kuhle. Kodvwa niyabona, sizatfu kunenkinga lengaka ebandleni, sizatfu kunalokunengi kakhulu kudideka ebandleni, kubhubha ebandleni, akusiko kutsi ngoba Jesu akekho lapho, kungoba Jesu angeke akhone kungena etindzaweni Lafuna kuhamba kuto. Sinalawo makulusi lamancane, futsi sitsi, “O, cha, ungakutsintsi *loko*. Manje Ungangena, kodvwa, o, loko kungena ngalokwenele. Ngitojoyina libandla, kodvwa, ngaphandle kwaloko, angigijime nebhizinisi yami lucobo.”

⁴² Jesu ufunu kuba ngumbusi lomkhulu kunabo bonkhe webunguwe bakho. Futsi indlela kuphela Langakubusisa ngayo kungesikhatsi Aba yiNkhosi yakho. *INkhosi* ku “kubusa, bunikati.” Ngubani lowakwenta na? Jesu. Ngubani lonelilungelo kuyo yonkhe indzawo enhlitiywensi yakho na? NguMdali. Awunatimfihlo embikwaKhe. Vula inhlitiyo yakho.

⁴³ Manje asikhulume, umzuzwana nje noma lemibili, ngaleminye yalemintyango lemincane.

⁴⁴ Lomunye wayo ungumnyango lomncane webugovu. O, siyakutfolo loko kakhulu enhlitiywensi yebuKhristu levumako. Bugovu, o, wena . . . Ngi . . . “Kwami nelicembu lami. Kuphela nje uma kusehlelwensi lami, kulungile. Kodvwa uma kungephandle, uma kungesilo libandla leBaptisti, noma akusiyi iPresbyterian yami, noma iPhentekhostali yami, uma kungephandle kwe-Assemblies, noma lokunjalo, akukalungi.”

⁴⁵ Khona-ke, niyabona, Khristu angeke abe nekubusa. Angeke abe yiNkhosi. Uma AyiNkhosi, Ungumbusi.

⁴⁶ Uma utsi, “Yebo-ke, ngi—ngitsandza Yena angentele intfo letsite, kodvwa uma ku . . . uma ngingatfolo lokukhulu kakhulu kuko. Ngitokuya esontfweni uma kutokwenta bantfu emmangweni wami bacabange kancono ngami.” Kodvwa ungeke uwuvule lomnyango lomncane. “NgitoMemukela, kodvwa angeke ngiMvumele angene *kulenzawo* lencane, ngoba ngibengalendlela lena kusukela ngisengumntfwana, futsi ngiva ngatsi ngingetulu kancane kwaloluhlobo lwebantfu. Ngitovumela Jesu angene, kodvwa angiyuze ngiye kulenyе yaletindzwo tasemishini letindzala letincane, lenye yaletotindzawo lapho bonkhe bampongolota khona ‘Amen,’ na ‘Ludvumo kuNkulunkulu,’ na ‘Haleluya.’ NgitoMngenisa, kodvwa angeke—ngeke ngiye kuloko.” Akasiyo iNkhosi yenu.

⁴⁷ “Timvu taMi tiyaliva liPhimbo laMi.” Khona-ke UyiNkhosi yenu. Ungumbusi.

⁴⁸ “NgitoMngenisa, uma batongitsatsa bangene ebandleni lelihle kunawo onkhe edolobheni.”

⁴⁹ Angikhatsali uma bebangabeka...kube bengifuna kuya ehhokweni. Noma ngukuphi lapho Bekafuna ngiye khona, bengiyohamba, kuphela nje uma Angibita. NgitoMvumela angene ngetizatfu kutsi UyiNkhosi yami. Noma yini Lafuna kuyenta, Akayente.

⁵⁰ Kunalomunye umnyango lomncane lobitwa ngekutichenya. O, emadimoni lamancane lamabi kabi onkhe achanekwe kuleyonhlitiyo yekutichenya, ucabanga kutsi uncono kunalomunye umuntfu. “Yebo-ke, ngingeke ngitfumele bantfwana bami lapho. Abagcoki kahle. Labantfu labaya lapha abekho ezingeni lami.”

⁵¹ Uma Khristu ayiNkhosi enhlitiywani yakho, sonkhe sisezingeni linye ngenca yaMoya munye. Sonkhe sibhabhatiselwe eMtimbeni munye. Kuticabha, kutivela kancane nje...Kudideka lokuncane lonako. O, awufuni kutsi Jesu atsintse loko, ngoba kutohliphita sitfunti sakho emmangweni. Ngingamane ngehlise sitfunti sami emmangweni, kunekutsi ngicishe ligama lami lisuke eNcwadzini yekuPhila yeliWundlu. Kodvwa bangeke baMvumele angene. Loko kuticabha lokuncane kuMkhiphela ngephandle.

⁵² “O, Jesu, yebo, ngitojoyina libandla. NgitoKwemukela, kodvwa, o, ungabuki kulelikamelo *leli*. Ngoba, Ungahlala esitulweni ngasemnyango, kodvwa angeke ngiKungenise kulelikamelo *leli*.” Khona-ke Angeke abe yiNkhosi yakho. Utofanele atfole kungena kulolonkhe likamelo endlini, yonkhe imigomo, tonkhe tintfo letincane temfihlo tekuphila. Utofanele abe nekungena kuko konkhe nalokuncane kwako, bese-ke Uba yiNkhosi.

⁵³ Ufunelani Yena kuta enhlitiywani yakho na? Kutoba yiNkhosi yakho. Unconcotsa emnyango, kutsi abe nguMsindzisi wakho. Futsi uma ubambe bugovu, nekutichenya, nenhlitiyo lembi, nato tonkhe letintfo leti enhlitiywani yakho, Angeke abe yiNkhosi. Naloku nje uMemukela angene, Angeke abe yiNkhosi. Uma AyiNkhosi, UyiNkhosi ngetulu kwako konkhe. Futsi nguloko Lakunconcotselako. [UMnaketfu Branham unconcotsa epulphi-Umhl.] “O, Nkhosi,” wena utsi. Mvumele angene.

⁵⁴ “Ngifuna kungena ngidle.” Lokudla kwakusihlw, ku “kuhlanganyela.” Uma unenhlanganyelo, lomunye nalomunye, kutsi i-iNkhosi nawe nibobhululu kanjani. Nibophathini, nanoma yini leninayo, Unayo naye, futsi. Noma yini Lanayo, ke, ninako, nani. Niyabona, Uba nguwe, kute wena ube nguYe, futsi yonkhe intfo imcondvomunye.

⁵⁵ Khona-ke kunalomunye umnyango lomncane enhlitiyweni, lengitsandza kukhuluma ngawo manje ekuseni, nalowomnyango lomncane ungumnyango wekukholwa. Labanengi labatisho kutsi bangemaKhristu abafuni kuvula lowomnyango wekukholwa. Manje wena utsi, “Nkhosi, Ungangena. Kunjalo. Kodvwa angikhulwa kutsi lonkhe liBhayibheli licinisile. Ngitawutsatsa loko lokushiwo libandla lami, kodvwa angeke ngikutsatse konkhe kwalo.” Itoke ikubusise kanjani-ke iNkhosi na? Angaba kanjani yiNkhosi yenu nemphilisi, uma Angawuvuli umnyango wenhliyiyo yakho wekukholwa na? Uma Angangena futsi utoMemukela, Utovula lowomnyango. Futsi Uyohamba angene kuloko kukholwa kwakho, futsi Uyodla nawe, emnyango wekukholwa.

⁵⁶ O, ngifuna kuMemukela, manje ekuseni, enhlitiyweni yami, kuyoyonkhe indzawo, kuko konkhe lengingiko. Ngifuna kuMemukela kuyo yonkhe iminyango. Sishwile sivuleke, futsi ume lapho futsi ucabuze inkomishi yetibusiso kanye naYe, emnyango, futsi utsi, “Yebo, Nkhosi, konkhe lengingiko, nako konkhe lenginako, nako konkhe, kungekwaKho. Asime kulomnyango, Nkhosi, futsi sicocisane lomunye nalomunye. Asibe nesidlosenkhosi emnyango wekukholwa, Nkhosi. Asibe nesidlosenkhosi emnyango wekutigcabha, Nkhosi. Asibe nesidlosenkhosi emnyango webugovu, Nkhosi. Kususe konkhe kimi, Nkhosi.” Kukholwa!

⁵⁷ O, wena utsi, “Ngitojoyina libandla, kodvwa ngikhulwa kutsi tinsuku temimangaliso setendlulile.” Khona-ke uyala kuvumela iNkhosi ingene emnyango wekukholwa futsi itibonakalise Yona lucobo kuwe. “O, yebo,” wena utsi, “kodvwa, Mnaketfu Branham, ngingumKhristu.” Ngiyati, s’tandwa lesitsandzekako, ungumKhristu, futsi ngiyakutfokotela loko, ngekwemukela iNkhosi, kodvwa uphila ngaphansi kwenhlanhla yakho. Ugcina umnyango wakho uvaliwe. Ugijima usuka ensiken iuya esigcotjeni, kanjalonjalo, ngoba awukholwa.

⁵⁸ Ufanele uvule lowomnyango wekukholwa, futsi uMvumele angene, khona-ke Utokunika sifiso senhliyiyo yakho. “Loyo lolindza eNkhosini uyovuselela emandla akhe. Bayokhuphuka njengetinkhozi; bayogijima bangakhatsali; bayohamba bangaculeki.” “Uma nihlala kiMi, nemaVi aMi ahlala kini, celani lenikutsandzako, nitophiwa kona.” O! “Ngicinisile, Ngitsi kini, uma niyotsi kulentsaba, ‘Cukuleka,’” futsi ku leksikhoni yasekucaleni yesiGrikhi, itsi, “‘icukulwe iphonswe elwandle,’ futsi ukholwe kutsi kuyentiwa.” O, hhe! “Kholwa kutsi kuyentiwa; utawuba nako lokushoko.” Impela.

⁵⁹ O, akudzingeki kutsi kube ngulotikhukhumetako. Akudzingeki kutsi kube ngaleyondlela. Impela akukafaneli. Kuphela nje uma nikukholwa. Ngulapho la emaKhristu ehluleka khona namuhla.

⁶⁰ LiBhayibheli latsi, “Kukholwa kukuciniseka ngetintfo letetsenjwako. Kubufakazi ngetintfo letingabonwa.” Ngako-ke bewungatsini kuko ke? Manje, akusyo inganekwane. Akusiwo umcabango. Akusilo litsema. Akusiso sifiso. “Kukuciniseka.” Kuyintfo sibili lonayo.

⁶¹ Sibonelo nje, ngita kuwe, futsi ngitsi kuwe, “Ngilambile. Ngifanele ngibe nesinkhwa lesitsite.”

Futsi wena utsi, “Udzingani na? Udzinga imali lenganani?”

⁶² “Ngidzinga emasenti langemashumi lamabili nesihlanu, kutsenga ilofu yesinkhwa. Ngilambile.”

⁶³ Futsi wena utsi, “Nankha emasenti langemashumi lamabili nesihlanu.” Manje, emasenti langemashumi lamabili nesihlanu ngemandla ekutsenga ilofu yesinkhwa. Futsi kuperhela nje uma ngisenemasenti langemashumi lamabili nesihlanu, nginaso. Kukuciniseka. Ngingajabula impela nje, ngime lapha nemasenti langemashumi lamabili nesihlanu, nelofu yesinkhwa eSitaladini Spring.

⁶⁴ O, alibusiswe liGama laKhe! AwuMvumeli angene. Vula lowomnyango wekukholwa. Uma Asho noma yini, kuliCiniso. Uma setsembiso saKhe sikuwe, loko kukuciniseka. Uma kukholwa kubambelela, kwati kutsi Nkulunkulu angeke acambe emanga, sekucatululiwe.

⁶⁵ Manje, nginemasenti langemashumi lamabili nesihlanu. Akusyo nje intfo lengiyicabangile. Nginemasenti langemashumi lamabili nesihlanu. Ngiphuma ngemnyango. Ngani, ngijabule nje njengoba nginjalo...kube benginesinkhwa, ngoba nginemandla ekutsenga.

⁶⁶ Futsi uma nginekukholwa, imisebenti seyiphelile; uma Angavula lowomnyango futsi angene, futsi anginike kukholwa kwaNkulunkulu enhlitiyeni yami. Sekuphelile, uma impela ngingaMkholwa. Kungahle kungenteki ngaso lesosikhatsi. Niyati, liBhayibheli lasho, kutsi, “Mosi wacinisela, aMbona Longabonwa.”

⁶⁷ Labanengi benu baye ngale kutsi babone imiYalo leLishumi, lebeyikadze ikhombisa eLouisville sikhatsi lesitsite. Sitfombe lesimangalisako.

⁶⁸ Manje, “Mosi wacinisela, kungatsi uyam abona Yena Longabonwa.” Longabonwa, *wacinisela*, loko kuchaza kutsi, wa “bambelela.”

⁶⁹ Abrahama, ngesikhatsi anikwa setsembiso, ngesikhatsi aneminyaka lengemashumi lasikhombisa nesihlanu budzala, kutsi bekatoba nemntfwana ngaSara. Kwacatululwa. Lona kanye leli-awa Abrahama lavula ngalo inhlitiyo yakhe, nemnyango wakhe wekukholwa, futsi watsi, “Kutokwenteka.” Futsi lapho sekakhulile, wa...LiBhayibheli latsi, “Akazange aphele emandla, ngekungakholwa; kodvwa

wacina ekukholweni, anika Nkulunkulu ludvumo, ngoba bekati kutsi Bekakhona kwenta loko Lebekakushito.” Nako-ke kukholwa. Iminyaka yendlula. Sara, kute umehluko. “Kodvwa akangabatanga ngesetsembiso saNkulunkulu, ngekungakholwa; kodvwa wacina, anika Nkulunkulu ludvumo.”

⁷⁰ Tsine lesitibita ngemaKhristu, sivumela Jesu angene. Utsi, “O, ngingumKhristu.” Futsi ungakhulekelwa, noma ugcotjwe, noma wente loko Nkulunkulu latsi kwente, noma Angenta ummangaliso ngaphambi kwakho, futsi ungakubona; futsi uma ungakaphiliswa masinyane nje, “Yebo-ke, nguloko-ke. Angikaze ngikutfole. Ngitobuya ngesikhatsi lesilandzelako.” Niyabona, akusiko kukholwa.

⁷¹ Ufanele uMvumele angene, tsani, “Nkhosi, nangu umnyango, ngena ubambe.” Bese-ke uma Angena lapho, kucatululwe ingunaphakadze.

⁷² “Ngime emnyango ngiyancconcotsa.” Utama kungena kulowomnyango lomncane wekukholwa. Uma kuphela Angasebenta indlela yaKhe ekhatsi lapho, khona-ke kuyintfo lecedziwe.

⁷³ Uma ngihamba nemasenti langemashumi lamabili nesihlanu esandleni sami, kuyafana njengesinkhwa, kimi, ngoba nginemandla ekutsenga e—ekuciniseka kwalengikufunako.

⁷⁴ Futsi uma kukholwa kubamba kwako enhlitiywani, akukho lokungakutamatamisa. Umsebenti sewuphelile. Nkulunkulu sewuwucatululile. Sewentiwe ingunaphakadze.

⁷⁵ Ngehla ngesitaladi. Ngewela umfula. Ngendlula emanyeiveni. Ngiba nekulamba kakhulu, sonkhe sikhatsi. Ngisengakasitfoli lesinkhwa kwamanje, kodvwa, sonkhe lesikhatsi ngihamba, Ngiyatfokota ngoba nginemandla ekutsenga nesiciniseko kutsi sinkhwa singesami.

O, alibusiswe liGama laKhe lelingcwele!

⁷⁶ Uma ngi... Ngaphambi kwekutsi ngifike lapho, ngingahle ngibe nebulhluu esiswini; ngilambe kakhulu. Ngingahle ngibe nekudzangala, ngize ngilwele indlela yami emahlatsini, njengendvodza leluhlanya. Kodvwa kuphela nje uma ngibambe emasenti langemashumi lamabili nesihlanu, sinkhwa sifanele sifike.

⁷⁷ Nako laph'ukhona, kuphela nje uma loko kukholwa kusimile! Bodokotela bangangencaba, konkhe, yonkhe intfo, kodvwa ngitoba lapho. Ngitophiliswa. Nkulunkulu washo njalo. NgitoMvumela angene emnyango wami wenhlitiyo. Kukholwa kwami kwanikwa Yena, futsi Wanginika setsembiso, futsi akukho lutfo lolutophatamisa. Kulapho. Kukholwa!

⁷⁸ Umnyango wekukholwa, mangakhi emaKhristu laMgcina ngaphandle na? Bangakhi bantfu bePhentekhostali labaMgcina ngaphandle kwalowomnyango wekukholwa na? Mangakhi

emaBaptisti? Mangakhi iPresbyterian? emaMethodisti?
Lowomnyango!

⁷⁹ O, kunalemenengi iminyango. Lomunye futsi lengitokhuluma ngawo, futsi ngulowo mnyango emehlweni enu. Watsi, “Wena uphumphutsekile, futsi awukwati loko.” Ukhuluma ngelibandla namuhla, liphumphutseke ngakamoya.

⁸⁰ Bengikhuluma ngalelelinye lilanga. Lokutsi, loku ngingeke ngakusho esiveni. Kodvwa kuMnaketfu Sothmann lapho, nalabanye labanengi, Leo naGene, kanye nabo, “Kuya kuphi loku na?” Ngasho. “Kungani bantfu bangatiboni letintfo leti na? Kungani bangacondzi na?”

⁸¹ Ngisho nalesositfombe sifanele sitamatamise tive, kodvwa hhayi ngisho—hhayi ngisho liphephandzaba lebelingakupakisha. Watsini George J. Lacy, lowe- F.B.I.? Watsi, “Mnumz. Branham, loko kutobasetitolo letibita sheleni, ngalolunye lwaletinsuku leti, kodvwa hhayi ngesikhatsi usaphila.” Alizange lihokome. Alizange liphendvule kulelelinye lilanga. Ngacabanga, “Liciniso.”

⁸² Cabanga ngeluhlanya ePortland. Cabanga ngabodokotela batsakatsi eNdiya. Cabanga ngalenhlanti lencane, uMnaketfu Wood, emfuleni. Cabanga netintfo letingehluleki, tifakazelo. Kepha noko angikwati ngisho kuphuma, kulukhuni, futsi ngibambe umkhankhaso lomkhulu; ngibambeleleka emuva. Intfo letsite ingadedela ihambe, kodvwa ibuyela emuva. Kuyini na?

⁸³ Abazange bamati Eliya waze wahamba. Abazange sebatilabanengi babo. Abazange batikutsi Johane bekangubani waze wajutjwa inhloko. Abazange bamati Jesu kutsi unguMsindzisi welive waze Wabetselwa waphindze wavuswa.

⁸⁴ Patrick loNgewe lewalitondza libandla laseKhatolika, futsi walibhikishela. Kodvwa emvakwekuba sekafile, bammemetela kutsi ungulongcwele. Bebangati nhlobo kutsi bekangulongcwele waze wafa futsi wahamba.

⁸⁵ Abazange batikutsi Francis loNgewe wase-Assissi bekangulongcwele. Wabikhikishela libandla laseKhatolika. Bekangumshumayeli lohambako neliBhayibheli ngaphansi kwemkhono wakhe. Ngehlela emfuleni kuyoshumayela, netinyoni letincane timpongoloza. Watsi, “Bodzadzewetfu labancane, thulani; ngishumayela Livi laNkulunkulu.” Futsi bathula dvu. Kodvwa bebangakwati loko waze wafa sikhatsi lesidze.

⁸⁶ Joan wase-Arc, lowasindzisa iFrance, lentfombatane yayingulongcwele. Yayiyakamoya. Yabona imibono. Bekanguwesifazane wakamoya. Weva tingelosi tikhuluma naye. Weva liphimbo laNkulunkulu. Wabona imibono. Batsini na? “Ungumtsakatsi.” Nelibandla laseKhatolika labetsela

sikhonkhwane phansi futsi lamchubela kuko, futsi bamshisa, labobapristi bakwenta, futsi yena amemeta acela sihawu.

⁸⁷ Eminyakeni lengemakhulu lamabili kamuva, bacondza kutsi bekangulongewe, ngako benta incumbi yekuphendvuka. Bagubha lowomtimba webaphristi lowamshisa, futsi bawuphonsa emfuleni. Loko kuyincumbi yekuphendvuka, kusobala. Kodvwa abamatanga waze weta wahamba.

⁸⁸ Jesu watsi, “Bebangeke bakholwe, ngoba Isaya watsi, ‘Banemehlo, kepha ababoni; tindlebe, futsi abeve.’”

⁸⁹ Itolo ebusuku, ekhasini lelingakabhalwa lutfo leliBhayibheli lami, ngesikhatsi esikhatsini lesitsite lesendlulile, embonweni iNkholosi lenginike wona, futsi ngakukhulumma ebandleni. Wase-ke Utsi kimi, “Yani e-Africa, bese-ke ubuyela eNdiya.”

Ngatsi, “Yebo, Nkhosi.”

⁹⁰ Futsi ngesikhatsi uMnumz. Baxter angitjela, eCanada, noma eChicago, watsi, “Asiye eNdiya. Akube maBhunu odvwa; abayubambisana natsi kahle.”

“Kulungile,” ngasho.

⁹¹ Ngakukhohlwa. Ngesikhatsi ngiya ekhaya, iNgelosi yeNkholosi yahlangana nami emkhatsini wemakameleo lamabili; iNsika yeMlilo, kuKhanya, Lofanako *ilapho*. Futsi Watsi, “Hamba e-Africa njengoba ngishito hamba.”

Futsi emnyakeni kamuva, bangikhulumisa ngako futsi.

⁹² Futsi ngakukhohlwa; angitange ngikubhale phansi. Futsi ngangikanye nemfana wami ePortuguese, eLisbon, ePortuguese. Futsi ngashaywa ngalahlwia phansi, ngigula, busuku bonkhe. Futsi ngekusa lokulandzelako, ngangihamba ngiyongena ebhavini lekugeza, kuyotsatsa kugeza lokuncane. Futsi endleleni yami ekhatsi lapho, nako kume iNgelosi yeNkholosi, yatsi, “Bengicabanga kutsi ngakutjela kutsi uye e-Africa kucala?”

⁹³ Ngatsi, “Nkhosi Nkulunkulu, angikafaneli kuba yinceku yaKho.” Ngatsi, “Uma Utsandza, phakamisa uMoya waKho futsi uWuphe lomunye.”

⁹⁴ Khona-ke, akubanga kudze kuze kube tinsuku letimbalwa letendlulile, ngesikhatsi ngenta emalungiselelo aseAfrica kulomnyaka, bangesheya lapho benta wona manje. Futsi itolo ebusuku, bengifundza embonweni, naNkulunkulu bekatyi kutsi ngitokwehluleka kuloko. Futsi embonweni... Angikaze ngikubone kwaze kwaba kuyitolo ebusuku. Futsi ngibite uMnaketfu Sothmann, Leo, nabo bonkhe, ndzawo tonkhe. Lombono watsi, “Utokuya eNdiya kucala, bese-ke ubuyela e-Africa.”

⁹⁵ Niyabona, nga—ngakubhala, cobo lwami. Ngayibhala lentfo, cobo lwami. Ngagcuma ngesuka embhedzeni lapho bengihleti khona, kusesekuseni ngalokunye kusa, futsi ngaMbona eta

ekamelweni. Futsi ngabhala phansi kona kanye nje loko Lelakusho, njengoba A—Angitjela lapho. Futsi ngakufundza, tikhatsi letinengi, letinengi, tikhatsi letinengi, futsi angikaze ngikucaphele. Futsi itolo ebusuku ngesikhatsi ngibita bafana, nako ke, khona lapho ekhasini leliphepha leliBhayibheli lami, lapho labanengi, bantfu labanengi balifundzile.

⁹⁶ Kwatsi, “Nako kufika bantfu labagcoke hhafu, futsi—futsi ngashumayela kubo, futsi bebajabula. Khona-ke kuKhanya kwamanyata, kamuva, futsi kwakhombisa labamhlophe nalabamnyama ndzawonye, e-Africa.” Angikaze ngikubone, ngikubuka ngco. Emehlo etfu avuleka.

⁹⁷ Nkulunkulu, vula emehlo ami, kute ngibone. Ake ngibuke ngale kwemakhethini esikhatsi, Nkhosi. Ake ngibone nje, Nkhosi, kutsi yini lengitungeletile. Ake ngibone kutsi yini lelungiselela kwenteka.

⁹⁸ Uma ngicabanga ngetidalwa letibantu letiphumphutsekile kulomhlaba, letibonako, kodywa noko tingeke ticondze; niyabona Nkulunkulu uta emhlanganweni futsi wenta tona kanye letintfo letifanako Latenta ngesikhatsi Alapha emhlabeni. Niyabona Jesu Khristu, iNdvodzana yaNkulunkulu lophilako yenta futsi yente futsi yenta njengoba nje Yenta ngesikhatsi Iseselapha emhlabeni, futsi basasolo bangacondzi. Kungenteka kanjani na? Ngoba emehlo abo akavulwanga.

⁹⁹ Atovula, ngalolunye lwaletinsuku leti, mngani wami, kodvwa kuyobe sekwephuteke kakhulu ngalesosikhatsi. Sikhatsi siyobe sesihambile. Futsi nitomangala, emuva, “Nicondze kungitjela kutsi, *luku*, kutsi *S'bani-bani* nentfo *lenje* kwakunguloku, futsi bengingakwati na?” Kweca ngetulu kwetinhloko tabo. AbaMbambi. Niyakubamba lelengikushoko na? Kwengca ngetulu kwabo. Kulapha...Futsi nibuke intfo letsite lenkhulu kutsi yenteke esikhatsini lesitako, lapho ikhona khona manje, futsi niyehluleka kuyibona.

¹⁰⁰ Nkulunkulu, ngena enhlitiywani yami futsi uvule iminyango emehlwani ami, kute ngibone.

¹⁰¹ Kutsi Kleyophase nemngani wakhe bahamba emgwacwени ngalelinye lilanga, bavela e-Emawuse, noma bay a-e-Emawuse. Futsi emgwacweni entasi lapho, Wakhulumu nabo, Wahamba nabo. Wadla nabo, nemehlo abo ekucondza avaliwe. Ngesikhatsi Angena ngekhatsi, futsi bonkhe bathula, Wenta intfo letsite lencane labayicondza, kutsi akukho muntfu lobekangayenta ngaphandle kwaKhe. Loko kusemvakwekuvuka kwaKhe. Futsi ngekushesha, liBhayibheli latsi, “Emehlo abo avuleka.” Wavula emehlo abo, base babuyela emuva entasi nemgwaco, batfokota, futsi batsi, “Impela iNkhosi ivukile, ngoba Beyinatsi lusuku lonkhe.” Emehlo abo avuleka. Bebanekucondza.

¹⁰² Jesu wetfu angangena ngco emkhatsini webantfu futsi ente tona leto tento letifanako impela, futsi kwentekani na? Bantfu

bayohamba bese batsi, “Kukufundza ingcondvo. O, angahle abe ngulokhonta imimoya yalabafa noma umbhuli, intfo leyentekе ngaleyondlela.”

¹⁰³ O, uma Nkulunkulu bekangavula emehlo etfu futsi sibone kutsi letintfo leti tiyini! Lowomnyango loya esweni usenhlitiyweni. Akusiko loko lokubona ngeliso lakho. Loko akusiko kubona; loko kubuka. Jesu watsi kuNikhodemu, “Uma umuntfu angakatalwa kabusha, angeke awubone uMbuso waNkulunkulu.” AwuLiboni ngemehlo akho; uyaLibona ngekucondza kwakho. Ubuka ngemehlo akho, futsi ucondze ngenhlitiyo yakho. Ngako umnyango wemehlo akho usenhlitiyweni yakho, ngoba ungumnyango wekucondza.

¹⁰⁴ “O, ngiyacondza kutsi Jesu watsi Uyokwenta loko etinsukwini tekugecina. Ngiyacondza kutsi letintfo leti tiluphawu lwaNkulunkulu.” Ngako-ke kwehluke kanjani, kutsi kuba ngulokuphatsekako kanjani kuwe, kutsi tintfo tintjintja kanjani, uma emehlo etfu avulekile. Unawe ngaso sonkhe sikhatsi. Uyakusita. Ume emnyango wakho, nsuku tonkhe, kodvwa awukucondzi.

¹⁰⁵ Ngeva umfundisi asho lokutsite, kungesiko kadzeni, loko kwangitsinta. Bekasentasi eningizimu, kwakukhona indvodza lendzala entasi lapho, indvodza lelikhalatsi, le...yayingumfo lomdzala lolungile, kodvwa abakhonanga kummisa asemgceni naNkulunkulu. Bekangeke nje aye enkonzweni, kepha noko bekangumfo lomdzala lolungile. Futsi abakhonanga kumtfola kutsi aye esontfweni.

¹⁰⁶ Ngako, ngalelinye lilanga, yena nemfundisi bahamba bayotingela. Futsi bekangakwati kakhulu kudubula. Akashayanga lutfo. Ngako lelo langa, emgwacweni baya ekhaya, bebadubule tinyamatane letiningi baze bansensa ngetinyamatane. Neligama lalendvodza lendzala lelikhalatsi kwakungu—kwakunguGabriyeli. Futsi wayibita ngaGabe, ngalokufinyetiwe. Ngako bekasensa, ngetinyamatane tilenga kuye; bekangakhoni ngisho kunyakata. Bekahamba emvakwemfundisi. Emvakwesikhashana wamshaya ehlombe, wase utsi, “Mfundisi?”

Watsi, “Yebo, Gabe, ufunani?”

¹⁰⁷ Watsi, “Ngelisontfo ekuseni, ngititfola mine ebhentjini lalabalilako. Ngitsatsa indzawo yami ebandleni, lapho kutsi ngiphile tonkhe tinsuku tami.”

¹⁰⁸ Umfundisi watsi, “Kuhle, Gabe. Kodvwa yini lebangela lokuntjintja lokutumako na? Leni, ngesikhatsi sikhulumawa nawe, futsi ngebunkulunkulu, bantfu labangcweli bakukhulekisile futsi bakuncenga, futsi ufulatselise inhlitiyo yakho na?”

¹⁰⁹ Watsi, “Basi, uyati, ngiyati kutsi ngingumdubuli lophuyile. Beningeke ngishaye lutfo.” Futsi watsi, “Buka letinyamatane lenginato. Ufanele kungitsandza, noma nakungenjalo

Bekangeke anginike tona.” Nako laph’ukhona. Kwakuyini na? Emehlo akhe avuleka nje. Wacondza kutsi Ngubani lomnika leyonyamatane, lapho ivela khona.

¹¹⁰ “Inkhabi iyasati sibaya sayo. Umnyuzi uyawati umkhombe wenkhosi, kodvwa bantfu baMi abati,” kwasho iNkhosi. Impela, abati kutsi letintfo leti letinhle tivelaphi. Uma emehlo akho bekavulekile, futsi ungabona.

¹¹¹ Esikhatsini lesitsite lesendlulile, indvodza yayisendleleni yayo leya elwandle. Yaiwelela lapho kuyophumula. Bekafuna kutihlumelelisa, ngenca yekutsi loko bekakutsandza.... Bekacabanga kutsi bekatotsandza kuva emalanda aselwandle lapho tindiza etikwemanti futsi teca phansi ngemagagasi lamakhulu lamhlophe, lapho asabhodla futsi achuma emoyeni. Futsi bekafuna kuhosha emanti eluswayi. Watsi, “Kuyoba kumphumula lokunjalo, kutsi ngihlale ngaselugwini lwelwandle, sikhashana. Ngifuna kumphumula nje. Ngifuna kuphila ngaselugwini lwelwandle, kubona tonkhe tintfo lwandle lolungatiniketa; tibhakabbaka letiluhlata, lapho tibonissa kusukela esibhakabbakeni kuya emantini. Kutsi emagwebu emanti laneluswayi atobila kanjani emagagasini lamakhulu, ashaye futsi agucuke!” Wase utsi, “Uma ngingema futsi ngibuke loko, futsi ngive kumemeta kwemalandanda!”

¹¹² Futsi asendleleni yakhe abheke elugwini lwelwandle, wahlangana nendvodza letako, futsi bekangulosebenta emantini lomlidzala, litilosii lelidzala lelivela elwandle. Watsi, “Uyaphi na?”

¹¹³ Watsi, “Ngiya entasi elugwini lwelwandle, kuyotfokotela buhle belwandle.”

¹¹⁴ Futsi litilosii lelidzala latsi, “Angiboni lutfo lolungakejwayeleki ngalo. Emanti angemanti nje. Sibhakabbaka sisibhakabbaka nje. Lilanda lingulenye nje inyon.” Niyabona, bekakubone kakhulu impela, kwate kwatayeleka kuye. Kwakungamjabulisi, kuye.

¹¹⁵ Futsi nguleyo indzaba ngani bantfu. Nibubonile bubele, nemimangaliso, netintfo tebuNkulunkulu taNkulunkulu, tihamba futsi tisebenta, tate tejwayeleka kini. Anisakunaki nhlobo.

¹¹⁶ Emihlanganweni, ngibacaphelile bantfu, lapho iNkhosi, ngaphansi kwekuhlola kwaYo, utokhuluma ngco etetsamelini, njengoba Enta nje ngesikhatsi Ahamba eGalile, futsi nje setsembiso saKhe Latsi Uyokwenta. Nebantfu, kwekucala, batsi, “O, ngake... O, leyo kufanele kube yiNkhosi.” Sikhatsi lesilandzelako, “Kufanele kufike.” Futsi emvakwesikhashana, “Yebo-ke, ngulenye intfo nje.” Kwejwayelekile. Sekunendlulile. Anikunaki. Emehlo enu ekuondza, inhlitiyo yakho, ibese iyavalelwka kuko.

¹¹⁷ Kujabulisa, kubusiseka kwekwati iNkhosi Jesu levukile ime emkhatsini wetfu, ufanele atfumele wonkhe umphefumulo kuphakama endlule noma yini kulelive yayingakujabulisa. Kufanele kwente lokutsite kuwe. Kufanele kunyakatise kukholwa kwakho ute uvule yonkhe iminyango yekukholwa, nako konkhe lokunye, utsi, “Nkhosi Jesu, tsatsa wonkhe mine ngibe ngewakho manje. Ngitsatse ngibe sekunakekelweni kwaKho. Lapha, ngena enhlitiyweni yami. Susa bugovu bami. Susa kungacondzi kwami. Susa kungabata kwami. Vula emehlo ami, Nkhosi, futsi ungibonise. Futsi tsatsa konkhe kwami, futsi ube yiNkhosi yami.” Lize libandla lente loko, sihamba ngebumphumphutse. Jesu unconcotsa emnyango, futsi siyaMshiya ngephandle. [UMnaketfu Branham unconcotsa epulpiti—Umhl.]

Asikhuleke umzuzwana nje, sisakhotsamisa tinhloko tetfu.

¹¹⁸ Tinhloko tetfu tisakhotseme nekuthula, buso betfu bubheke ngaselutfulini lesatsatfwa kulo. Futsi ngalelinye lilanga lenyama lefako iyofanele i...imiphumela iyobuyela elutfulini. Kufanele kubekhona umuntfu lonjalo lapha manje ekuseni, longakaze avule inhlitiyo yabo, ngalendlela, eNkhosini Jesu, loyophakamisela tandla takho kuYe manje, futsi utsi, “Jesu, bani nemusa kimi”? Nkulunkulu akubusise, mnumzane. Nkulunkulu akubusise. Lomunye futsi. Nkulunkulu akubusise, mfo lomncane. “Ngivula inhlitiyo yami kulesikhatsi lesi.”

¹¹⁹ Utsi, “Nkhosi Jesu, ngitsatse, konkhe, ngibe lifa leligcwеле. Bani yiNkhosi yami.” Nkulunkulu akubusise, mnumzane. Ta-...“Bani yiNkhosi yami.” Nkulunkulu akubusise, dzadze. “Bani yiNkhosi yami; iNkhosi yekutigcabha kwami, iNkhosi yekukholwa kwami, iNkhosi yemehlo ami, iNkhosi yekubona kwami, iNkhosi yekuva kwami, iNkhosi yekutsandza kwami.” Letinengi taletintfo leti lebengingakhuluma ngato, kodvwa sikhatsi besingeke sikuvumele. “Bani yiNkhosi etikwako konkhe.” Nkulunkulu akubusise, dzadze. Nje... Nkulunkulu akubusise, mnaketfu. “Ngitsatse, Nkhosi.” Nkulunkulu akubusise, mnaketfu. “Ngitsatse njengoba nginjalo, Nkhosi.” Nkulunkulu akubusise, dzadze. Nkulunkulu akubusise, mnaketfu. Nkulunkulu akubusise, emuva lapho. Kunjalo. “Ngitsatse njengoba nginje, futsi ngilawule ngalokugcwеле, Nkhosi. Mangingakuholi. Ngihole.” Lomunye umfo bekatsi... Nkulunkulu akubusise, mnaketfu.

¹²⁰ Lomunye umfo watsi waphuma wangena edlelweni futsi wabamba lihashana, lapha ngalelelinye lilanga. Wabeka intsambo entsanyeni yalelihashana, wase wenta ihhafu yesifonyo emlonyeni webuso balo, futsi bekahola lelihashana alibuyisela esibayeni. Ngaphambi kwekutsi afike lapho, lelihashana lalimhola.

¹²¹ Kunguloko-ke. Nkulunkulu uyasibamba, futsi sitama kuMhola. AKasihole. Uyayati indlela. Uhambile kulomgwaco. Yenta umgwaco. Asiyati indlela, ngako kungani sitama kuzindla ngaletintfo leti na? Asitinikele nje kuYe, sitsi, "Nkhosi, Wena ngihole. Ngitolandzela."

¹²² Mhlawumbe bewungumKhristu. Mhlawumbe Khristu ungene enhlitiyweni yakho, kodvwa awukaze ukhulule kukholwa kwakho, kuYe. Utsi, "Nkhosi, ngena. Susa konkhe kungabata enhlitiyweni yami. Uma Livi laKholisho loko, ngiyaLikhola. Ngako, kusukela kulolusuku kuchubek, ngitsatsa Wena njengoba ngi...Ngifuna Wena unginike loko lomnaketfu lakushito nje, njengensimbi yemali lengemasenti langemashumi lamabili nesihlanu yesinkhwa. Futsi emkhulekweni manje ekuseni, walabagulako, ngitoKwemukela. Ngikhola kutsi Utokwenta. Futsi ngihamba ngichubeka ngco, ngitfokota, akunandzaba kutsi kwenteka nini. Kutokwenteka." Ningatsanza kuvula umnyango wenu wekukholwa, enhlitiyweni yenu, kuYe namuhla na? [Akucoshwanga etheyiphini—Umhl.] ...bewungatsanza, bese uphakamisa tandla takho, futsi utsi, "Nkhosi, ngilapha." Nkulunkulu anibusise. Ticuku netandla tabo tiphakeme.

Wena Wundlu laseKhalvari,
Msindzisi webuNkulunkulu;
Manje ngive ngisakhuleka,
Futsi ngisuse tonkhe tono tami, (kungakholwa
kwaMi.)
O akutsi mine kusukela namuhla
Ngibe waKho wonkhe!

¹²³ Nkhosi Jesu, Wena uyatibona letandla tebantfu. Uyatati tinhltiyo tabo. Wena ume lapho. Loko kunconcotsa kwaKho. Kwangatsi bangete babuka kulenye insumansumane. Kodvwa kwangatsi bangabuka ngco ebusweni beNdvodzana yaNkulunkulu lebetselwe. Kwangatsi bangaba nekucondza manje ekuseni, kwangatsi abakaze phambilini. Siphe, Nkhosi.

¹²⁴ Sibe nebumatima. Sathane usilwisile ngayoyonkhe indlela. Ngisho nangalomhlangano manje ekuseni, bekungekho ngisho namunye lapha kutsi anikete emakhadi ekukhulekelwa, kutsi babesemgenci, kubantu bangaphandle kwalelidolobha; kute Wena ukhone kuhombisa lobucicimako beBukhona baKho, ngekxesiphiwo sebuNkulunkulu, nentsandvo ngemandla aKho lamakhulu. Kodvwa Wena Nkulunkulu lobusa ngetulu kwetintfo tonkhe. Ubusa etikwebumatima neticindzetelo.

¹²⁵ Futsi ngiyakhuleka, Nkulunkulu, namuhla, kutsi Utobamba inhlitiyo yawo wonkhe umuntfu, kungenela kuyo yonkhe indzawo nangemgom. Kwangatsi bangashwila bavule inhlitiyo yabo njengamanje, nabo bonkhe labo labaphakamise tandla tabo, nekuba ngulonebugovu, noma kubangulodzebeselako,

noma tintfo Bewungeke ufune kuba ngito. Kuyakhombisa emphilweni yabo, kutsi Awuphili kuloyomgom. Kwangatsi kungavulwa njengamanje. Futsi, Nkhosi Jesu, ngena futsi wente kuhlala nabo.

¹²⁶ Futsi-ke, Nkhosi, sitokhulekela futsi laba labagulako nalabahlaselekile, kutsi kuleli-awa, kutsi kube khona lokwentekako, loku lokutawumangalisa laba bantfu ekucondzeni kwekucondza kweBukhona baJesu Khristu, kute tinhilityo tabo tivulwe. Ngiyakhuleka eGameni laJesu. Amen.

¹²⁷ Bekuniketa, emsakatweni, nangemlomo, etabernakeli, kutsi namuhla besitoniketa emakhadi ekukhulekelwa. Futsi sizattu siniketa emakhadi ekukhulekelwa, latabernakeli, kutfola bantfu bangaphandle kwalelidolobha. Niyabona na? Kutsi, bantfu balapha edolobheni, sinekubakhulekela nsuku tonkhe, noma tikhatsi lapha etabernakeli. Kodvwa kutfola bantfu... Emandla ekuhlolola lokufihlakele akuKhristu yedvwa. Futsi noma ngubani uyakwati loko. Loko kukuNkulunkulu yedvwa. Futsi e... .

¹²⁸ Ngesikhatsi Khristu asemhlabeni emtimba wenyama, njengoba simile namuhla, Wahamba eGalile netindzawo letehlukene. Lapho Akatishongo kutsi abenemandla ekuphilisa labagulako noma ente imimangaliso. Watsi, “Ngingeke ngente lutfo ngekwaMi. Angenti lutfo aze kucala Babe aNgikhombise kutsi angenteni.” Noma ngubani lowati umBhalo, Johane loNgcwele 5, uyati kutsi loko kuliciniso. Akentanga imimangaliso waze Babe waMkhombisa. Watsi, “Ngicinisile, ngicinisile, Ngitsi kini, iNdvodzana,” cobo lwaYo, litabernakeli Nkulunkulu lebekahlala kulo, umtimba waKhe, “iNdvodzana ingeke yente lutfo ngekwaYo; kodvwa loko Lebona uYise akwenta, loko iNdvodzana iyakwenta kanjalo.”

¹²⁹ Futsi niyacaphela ngesikhatsi Efika eveni laKhe luCobo, lidolobha laKhe luCobo, kwentekani na? Bekangeke akwente. Wabeka tandla taKhe etikwalabanye bafo labagulako. Wagucuka wase utsi, “Ngicinisile, Ngitsi kini, kutsi umprofethi, eveni lakubo lucobo, emkhatsini webakhe lucobo...” Niyati kutsi loko kwashiwo kanjani, loko.

¹³⁰ Kodvwa Ubenemusa kakhulu kitsi, kusivumela kutsi sibe nemihlangano lembalwa yalolohlobo. Kunjalo. Kutoqwentani na? Kuvumela lelidolobha, labantfu laba, nalabo labatungelete, labangakaze baphumele ngephandle, kulomunye umhlangano, kwati kutsi UnguNkulunkulu lophilako. Watsi, “Letintfo leti leNgitentako, nani niyotenta. Niyokwenta lemisebenti lefanako.” Watsi, “Kusesikhashana nje nelive lingike lisaNgibona, noko nine nitoNgibona. Ngoba Ngitawuba nani, ngibe ngisho nakini, kute kube sekupheleni kwemnyaka.” Kunjalo. “Netintfo leNgitentako, nani nitawutenta, kute kube sekupheleni kwemnyaka.”

¹³¹ Ngikholwa kutsi siphila etinsukwini tekuvalwa kwesikhatsi sebeTive. Yonkhe intfo iphelele nje ngalokuhlelekile, khona manje, kwesikhatsi sekugcina. Kodvwa kuya eKhaya kweliBandla, nguloko Khristu lakulindzele. “Njengoba Bekanjalo etinsukwini taNowa, kukhutsatela, angatsandzi kutsi kubhubhe namunye.” Uyintfo lefanako namuhla. Hhayi... Kukhutsatela kutsi Unguye manje, angatsandzi kutsi kubhubhe namunye. Tibonakaliso letinkhulu netimanga setihambile.

¹³² Bantfu batsi, “Yebo-ke, sibuke umnyaka lomkhulu lotako.” Mngani wami, lomnyaka sewutsi awuphele nje. BeTive sebaphelile. Kusesikhatsini sekugcina. Ngako manje sekusikhatsi sekubanjalo, kwemukela Khristu nekutilungiselela. Manje lalela, mngani, angati...

¹³³ Manje, kute likhadi lekukhulekelwa endlini. Kute ngisho nalinye. Billy bekalapha esikhashaneni lesendlulile, noma ndzawanatsite. Bekanemakhadi cishe lalikhulu kutsi awakhiphe, kodvwa bantfu abazange befiike lapha kutsi abanike wona. Badzingeke kutsi bacale inkonzo, ngako asikuphatamisi loko. Ngako ngatsi, “Ngitobita bantfu nje futsi ngibakhulekele.”

¹³⁴ Kodvwa ngiyeva kutsi Bukhona baKhristu bulapha. Ngiyeva kutsi ngilungisele, naloMlayeto, ngisho, welibandla manje ekuseni, ngaleyonhloso. Futsi ngandrela tsite sitsa sisibangele tinkinga ngalenye indlela, kodvwa ngiyakholwa kutsi Khristu uyakwati kutsi asehlule sitsa uma tinhlitiyo tetfu tilungile kuYe. Nalabanengi benu bantfu labaphakamise tandla tabo, kusobala, masinyane nje uma lenkonzo seyiphelile, uma kwentiwa kubitela e-altari, ngifuna ute lapha futsi ubonge Nkulunkulu ngaloko Lakwentele kona.

Uma wemukela kukholwa, yini kukholwa na?

¹³⁵ Besingakha lilayini lalabakhulekelwako lapha, futsi siletse bantfu bendlule, ihhafu yedazini noma ngetulu. Loko kuhlola lokufihlakele kunemandla kakhulu, futsi Ku—Kutawuta lapha ngembili, futsi nitocaphela. Ngineminyaka lengemashumi lamane nesiphohlongo budzala; imibono iboniwe kusukela cishe ngeneminyaka lemibili budzala, futsi akukho nasinye sikhatsi lapho ike yehluleka khona. Ngisho netintfo, uma bengingatisho, ngangingati kutsi kwaku—kutsi kwakungaba kanjani. Kodvwa kusebenta ngaleyondlela nje, khona-ke nguNkulunkulu. Niyabona na? Kufanele kube nguNkulunkulu. Khona-ke uma Nkulunkulu akhona, kugewaliswa Livi laKhe, kufakazela kutsi U... “Letintfo leti leNgitentako, nani nitotenta.” Khona-ke Uyakufakazela loko kutsi kunjalo. Ngako-ke, Nkulunkulu, vula emehlo etfu. Kube besingakubona loko kufezeaka, khona-ke sonke setsembiso sicinisile.

¹³⁶ Ngesikhatsi Asemhlabeni... Umzuzwana nje. Ngesikhatsi Asemhlabeni, Watsini na? Naku Lakusho. Watsi, “Bhidlitani loMtimba, NgitoWuvusa ngetinsuku letintsatfu.” Wakwati

kanjani Yena kwenta loko na? Ngoba Davide umprofethi watsi, "Angiyuvuma kutsi Longcwele waMi abone kubola, kanjalo futsi aNgiyuvuma...ngishiye umphefumulo waKhe esihogweni." Bekati kutsi BekanguMesiya logcotjiwe. Bekati kutsi leyo kwakuyindzawo yaKhe. Futsi ngekwati kutsi leyo kwakuyindzawo yaKhe...Manje caphelani. Ati kutsi leyo kwakuyindzawo yaKhe, khona-ke Wakhona kuniketa lesositatimende, ngoba leso setsembiso sabhocwa kuYe. Watsi, "NemiBhalo ingeke yephulwe." Uma kucondza kwakho kuvula! "ImiBhalo ingeke yephulwe." Leso setsembiso besiFanele kuYe, futsi Bekati kutsi kwakufanele kufezeke.

¹³⁷ Khona-ke lalelani, bangani. Wonkhe umBhalo lophat selene nani, sonkhe setsembiso lesicondzene nani, kungekwakho, njengoba nje loko kwakukwakhe. Impela, kunjalo.

¹³⁸ Kungako ngime manje ekuseni. Ngi, uma iNkhosi itovuma, ngitoYicela kutsi yente lokutsite, futsi ekhatsi lapha lapho kulukhuni khona kakhulu, nakanjalonjalo. Ngekwami...Hhayi ngoba ningakholelwa kimi, kodvwa kungoba Livi laKhe latsi loku kuyoba njalo. Niyabona na? Livi laKhe latsi kuyoba njalo. NgitoMcela kutsi acedzise simo selikhadi lekukhulekelwa. Niyabona na? NgitoMbuta uma Atokwenta. Niyabona na? Angi...

¹³⁹ Manje khumbulani, ake ngichubekele erekhodini, nalemishini yetheyiphu lapha lehambako, leminengana yayo endlini lapho. Angisho kutsi Utokwenta. Niyabona na? Angisho. NgitoMcela kutsi akwente. Futsi uma Atsandza, sitobonga. Uma-ke iNkhosi...Bangakhi...

¹⁴⁰ Akukho namunye ngephandle lapho lonelikhadi lekukhulekelwa. Bangakhi bantfu labagulako ngephandle lapho, logulako, phakamisani tandla tenu, noma—noma nibe... nifuna lokutsite lokuvela eNkhosini na? Phakamisani tandla tenu, noma ngabe nikuphi. Manje ngiyabubona buso benu, kute nje ngikhone kusho kutsi ungu bani. Ngako, a—angi... Ngingasho...

¹⁴¹ Futsi uma kungunoma ngumuphi webahlobo balatabernakeli, angibafuni labobafo. Ngifuna iNkhosi ingikhombise umuntfu lokhashane nelitabernakeli; umuntfu lovela ngephandle kwalelidolobha. Ngoba, uma lotsite lovela etabernakeli...Kungako sikhisha emakhadi, kutfola bantfu labangekho latabernakeli. Kuze...

¹⁴² Bantfu batsi, "Yebo-ke, uyamati lowomuntfu. Kuvela kanjalo-ke loko kuhlol."

¹⁴³ Ifika kanjani eTaliyane, eJalimane, eSwitzerland, e-Africa, nandzawo tonkhe, emhlabenzi wonkhe jikelele na? Ihlala kanjani lapha futsi itjele tintfo letitokwenteka eminyakeni lemitsatfu noma lemine, lemine noma lesihlanu, futsi bakushaye nje ngalokuphelele nciamashi? NguKhristu.

¹⁴⁴ Kwakungubani Yena, wahola bantfwana baka-Israyeli badzabula ehlane na? Khristu. BekaYini ngalesosikhatsi na? Ngifuna kunibuta lokutsite. Cabangani ngaloku umzuzu nje. Bekayini Yena? INsika yeMlilo. INsika yeMlilo. Futsi ngesikhatsi Efika emhlabeni, Washo kutsi BekanguleyoNsika yeMlilo. U . . .

Batsi, “Bobabe betfu badla imana ehlane.”

Watsi, “NgiSinkhwa sekuPhila.”

Watsi, “Bobabe betfu banatsa eDvwaleni lakamoya.”

Watsi, “NgiliDvwala.”

“Ngani,” batsi, “Mosi waMbona esihlahleni lesivutsako.”

¹⁴⁵ Watsi, “Angakabikhona Abrahama, NGIKHONA.” LO “NGIKHONA” lobekasesihlahleni.

¹⁴⁶ Watsi, “Manje, ngavela kuNkulunkulu, iNsika yeMlilo.” Nkulunkulu ukuKhanya, siyakwati loko. Yena, Nkulunkulu, uhlala kuMoya, hhayi enyameni. Futsi kuleNsika yekuKhanya, Jesu watsi, “Ngavela kuLoko, futsi Ngibuyela kuLoko.” Manje, loko kungahle kuphume esayensini yakho yetenkholo, kodvwa kuseBhayibhelini. Jesu wakusho.

¹⁴⁷ Futsi ngesikhatsi Afa, angcwatjwa, wavuka futsi, futsi ngesikhatsi Pawula loNgcwele asendleleni yakhe abheke entasi eDamaseko, kuyobopha bantfu, Jesu wabonakala kuye, futsi kuleyoNsika yeMlilo, futsi yamshaya yamlahla phansi. Manje, kungenteka, munye angaYibona futsi labanye bangaYiboni. Lawo madvodza lebekanaPawula akaYibonanga. Batsi, “Sivile umsindvo, kodvwa asibonanga kuKhanya.” Kodywa kuKhanya kwakukhanya kakhulu, kuPawula, kwate Kwaphumphutsekisa emehlo akhe, futsi bekaphumphutsekile tinsuku letitsite. INsika yeMlilo!

¹⁴⁸ Uta ku—Uta kuPhetro, ejele, njengeNsika yeMlilo.

Futsi Nangu namuhla!

¹⁴⁹ Futsi uma umoya wa—wadeveli ukuwe, uyokwenta imisebenti yadeveli. Uma ungumgulukudvu, umoya, uma umoya waJohn Dillinger wawukuwe, bewuyophatsa tibhamu futsi ubulale bantfu. Uma umoya wanoma yini bewukuwe, uyokwenta utiphatsise kwalowomuntfu.

¹⁵⁰ UMoya waKhristu ukuwe, Uyotiphatsisa kwaKhristu. Uyokwenta imisebenti yaKhristu. “Loyo lokholwa ngiMi, lemisebenti lengiyentako Mine naye utoyenta.” Nako laph’ukhona.

Futsi manje ngibeka loku kwentela inkhatimulo yaNkulunkulu nje.

¹⁵¹ Futsi sengiba likhehla, futsi ngiyati tinsuku tami tingahle tingabi tindze kakhulu emhlabeni. Angati. Loko ngingeke ngakusho. Ngiyetsema kutsi ngitophila kutsi ngibone kuBuya kweNkhsosi. Angati kutsi ngitophila. Kodywa, angati kutsi

ngiyoke ngishumayele lenye inshumayelo. Kodvwa ngi... Singeke sakusho loko. Loko kusetandleni taNkulunkulu. Angati.

¹⁵² Kodvwa nayi intfo yinye. Ngi... Uma sitoMcela kutsi ete ekhatsi manje ekuseni, futsi ente lokutsite, bufakazi lobungenakuphosisa bako, kutsi UnguKhristu lovukile lofanako, futsi wenta intfo lefanako Layenta ngesikhatsi Ahamba etingwini taseGalile, Angati kutsi bangakhi labangatsi, "Ngingalahlekelwa lilungelo lendzawo elayinini lalabakhulekelwako, ngisho noma ngabe Akungibitanga. Beningalahlekelwa yindzawo yami. Futsi Ngiyakholwa kutsi enhlitiywani yami ngitobambelela ekukholweni lokutangibamba ngime ngicine kuKhristu, futsi bengihamba ngisuka kulesakhiwo manje ekuseni"? Uma Atokuta kulemitimba yebantfu lapha manje ekuseni, futsi anikete lomunye lapho kukholwa lokwenele, njengoba kwenta lowesifazane lowatsintsa sembatfo saKhe!

Futsi Wacalata, watsi, "Ukhona loNgitsintsile."

Futsi batsi, "Yebo-ke, wonkhe umuntfu uyaKutsintsa."

¹⁵³ Watsi, "Kodvwa ngive kutsi ngiphelelwwe ngemandla." Futsi Wabuka ngale endzaweni waze Wamtfola lowesifazane, futsi Watsi, wamtjela kutsi bekanani, nekutsi yayiyini inkhatsato yakhe, futsi watsi kukholwa kwakhe kwakumsindzisile.

¹⁵⁴ Lowo kwakunguJesu. Ngitjele noma ngubani lowake waphila emhlabeni, lowake wakwenta, ngaphandle kwaKhe. Ngikhombise umlandvo lapho kwake kwentiwa khona. Nginencwadzi yaFoxe yaLabafela Lukholo. NginukuBhala Kwasekucaleni kwaJosephus. NginemiNyaka yaseKucaleni yaPember-man. NginemaBhabiloni Lamabili a-Hislop. Akukaze kubekhona noma yini leyenteka njengako kuze kube ngulolusuku, kunjalo, ngoba sisesikhatsini sekugcina. Sisesipampulekini sesikhatsi. NebeTive bayaphela, ngeke kube sikhatsi lesidze site sibe malahle nemilotsa.

¹⁵⁵ NiyaMemukela. Uma Atokwenta, angisho kutsi Utokwenta, uma Angakwenta, sitobita lilayini lalabakhulekelwako, uma Akwenta, bewungatsi, "Futsi ngiyati umuntfu akejwayeleki mbamba, naNkulunkulu wenta loko, Ngitokholwa kutsi iNkhosi Jesu ikhona, futsi Itotsatsa licala lami etandleni taYo, Ngitokunikela lapho, futsi ngitokwemukela, njengalawo masenti langemashumi lamabili nesihlanu, ngitohamba ngisuka lapha ngibonga Nkulunkulu ngekuphiliswa kwami"? Ningakwenta na? Phakamisani tandla tenu, futsi nibone. Bangakhi ekhatsi lapha labatotsi utokwenta na? Phakamisani tandla tenu nje, ndzawo tonkhe. Loko kuyamangalisa. O, hhe!

¹⁵⁶ Manje ngena wena esimeni. Dvonsa leyonhlitiyo ivuleke. Utsi, "Jesu, uma Wake wasebenta enhlitiywani yami, kwente manje. Khipha konkhe kungakholwa. Angivuke

lapha, ngititsintsitse. Ngabe kuliciniso yini kutsi ngendlule entfweni letsite, yonkhe leminyaka, futsi ngaphutselwa ngiko na? Ngabe sengivalelwé ngci na? O, yebo, ngiyati kutsi Unami. Kodvwa ngabe ngiKuvumele ungene, ndzawo tonkhe, kuKubona na?” Uma ungaMbona manje ekuseni, kukholwa kutobambelela, netifo titohamba. Utosindza. Kukholwe manje. Hhe! Ngiyetsema nitokukholwa. Nkulunkulu, siphe kona, ngumkhuleko wami.

¹⁵⁷ Manje, ngaphambi kwekutsi sente, asikhuleke.

¹⁵⁸ O Nkhosi, lolu lusuku lolubi kakhulu lesiphila kulo. Ngiyacondza kutsi yonkhe intfo lebeyingenteka, itofanele ibe nguWe lokuvumela kutsi yentiwe, Nkhosi. Kunalanabengi lapha, idazini noma lamabili, mhlawumbe labasesimeni lesibucayi, lomunye longeke asindze, uma kungesiko kwaKho. Futsi ngikhulekela kutsi Utosipha lesibusiso lesi.

¹⁵⁹ Futsi, Babe, siyati kutsi yinye kuphela indlela yekwemukela kukholwa. LiBhayibheli liyasho, kutsi, “Kukholwa kuta ngekuva, kuva Livi laNkulunkulu.” Livi laNkulunkulu litsi, “Jesu Khristu unguye itolo, namuhla, naphakadze.” Livi laNkulunkulu litsi, “Letintfo leNgitentako, nani niyotenta.” Livi laNkulunkulu latsi, “Konkhe kungenteka kulabo labakhowlako.” Futsi, Nkhosi Nkulunkulu, sitama kutfola kukholwa etinhliityweni tebantfu, kutsi bavule iminyango yabo, kute babone, futsi bati kulunga kwaNkulunkulu, kuvumela letintfo leti tibe njalo.

¹⁶⁰ Manje sihawukele, Nkhosi. Njengoba ngiguce lapha eceleni kwaloluhlangotsi lwe-altari, O Nkulunkulu lonesihawu, bani nemusa kitsi. Ngikhulekela wonkhe umuntfu losekhatsi lapha, Nkhosi, ngalabafo balatabernakeli, ngalabafo bangephandle kwalelidolobha, ngabo bonkhe. Utsite, “Umkhuleko wekukholwa utomsindzisa logulako. Nkulunkulu uyobavusa. Futsi uma bente sono, bayotsetselelwa sona.”

¹⁶¹ Futsi siyacondza kutsi bantu labemukela noma yini ngalenye indlela kuneLivi, akuhlali sikhatsi lesidze kakhulu. Sicabanga ngebantfwana baka-Israyeli, kutsi bonkhe bakhubeka kanjani kulokungetulu kwemvelo, base-ke bawela ehlane.

¹⁶² Impela kunjalo, Nkhosi, futsi njengoba bantu anekukholwa lokucinile eVini laKho!

¹⁶³ Manje siphe, manje ekuseni, kutsi Bukhona baKho lobukhulu butovumela loku lesikucelako, Nkhosi. Kute bantu bati futsi babone inkhatimulo yaNkulunkulu. Futsi kwangatsi wonkhe umuntfu losekhatsi lapha manje, kwangatsi lenye intfo letsite, kukholwa, kungehla ngemigudvu yaMoya waNkulunkulu, futsi bagcobe inhlitiyo yabo njengamanje, nemehlo abo avuleke. Kutsi, uma bashiya lesakhiwo lesi, namuhla, kutsi batotsi, “Tinhliityo tetfu betingavutsi yini

ngekhatsi kwetfu na? Ngoba, sibubonile buNguye lobuvukile. Besitibuta, kodvwa manje siyacondza.” Nkulunkulu, vula umnyango wabo manje, wekukholwa, bese uyangena. Futsi utembule kubo, futsi wente kwatiwe tindlela taKho nentsandvo.

¹⁶⁴ Ngisite, Nkhosi. Ngisikhonti lesibi seMbuso waKho. Angikafaneleki. Futsi ngicela kutsetselewa kwetono tami lucobo, kungabata kwami lucobo, nekwesaba, netiphambeko, nekungabinandzaba, nako konkhe lengikwentile. Nkhosi, ngitsetselele. Futsi ngisite kutsi ngibe ngulegcamilie, inceku lekhaliphile yaKho, kute ngidvumise liGama laKho embikwebazalwane bami. Etintfweni lengingenawo emandla ekutenta, ngiphe emandla, Nkhosi. Hhayi ngenkhatimulo yami, impela, Nkhosi, yonkhe leminyaka Ungivivinyile. Ngiyakhuleka kutsi ngitfole umusa enhlityweni yaKho manje ekuseni, kute ngizuze sikhatsi lesincane senhlanganyelo nekudla naWe. Siphe kona, Nkhosi. Ngikhulekela kutsi Utongisita manje. Futsi unikete bantfu kukholwa, ngoba ngiyasukuma kutsi ngibuke, kubona kutsi Utokwentani. EGameni laJesu. Amen.

¹⁶⁵ Manje, ungangabati. Kholwa nje, ngoba konkhe kungenteka kulabo labakholwako.

¹⁶⁶ Manje, iNkhosi Jesu ayikabopheleleki kusentela loku. NgitoMcela lokungenani bantfu labatsatfu lengingabati; bantfu labatsatfu lengingabati, kutsi Yena angangembulela. Ini... Ngifuna nonkhe lonesidzingo sanoma yini, kutsi nikhuleke. Futsi loko Lakwembulako, uma kuliciniso, nitokwati, noma ngabe kuliciniso noma cha. Uma kungesilo liciniso, khona-ke akusilo liciniso nje. Utokwati lapho, cobe lwakho. Kodvwa uma kuliciniso, khona-ke uyakwemukela futsi ukwemukele.

¹⁶⁷ BekaNgentani kube Bekeme lapha manje ekuseni na? Kubekke Bekeme lapha lapho ngime khona, nemtimba wenyama njengoba ngimile na? Uma bewungatsi, “Nkhosi Jesu, ngidzinga kuphiliswa,” ucabanga kutsi Bekatotsini na? Bekatsi, “Yebo-ke, ngi—ngikwentele loko ngesikhatsi ngikufela.” Bangakhi labatiko kutsi lelo liciniso na? Impela. Selivele licedziwe.

¹⁶⁸ Ngako-ke yini lokungakwengetela lukholo na? Ngoba uMnaketfu Neville nami site sikhuleke, futsi sibeke tandla etikwakho, sikugcobe ngemafutsa na? LiBhayibheli lisho loko. Yenta loko, loko kuhle. Siyakukholwa loko. Ngaletinye tikhatsi abagcobi ngisho ngemafutsa. Ngaletinye tikhatsi bavele nje, banekubona lokufihlakele, futsi batfola imimoya lemibi futsi bayikhiphele ngephandle. Ngaletinye tikhatsi loko kwentiwa ngaleyondlela. Futsi ngaletinye tikhatsi kwentiwa nje nge... Ngesikhatsi Jesu ahamba... Manje lesi... Nguloko Lakunika baphostoli. Nguloko baphostoli labakwenta. Futsi tikhatsi letinengi bakwenta ngetindlela letehlukene.

¹⁶⁹ Manje ngukuphi lokutosebenta kakhulu, njengoba sibe nemihlangano leminengi kakhulu lapha, ngukuphi

lokuyosebenta kakhulu manje? Kuvumela nje iNkhosi Jesu kutsi yehle futsi itifikazele Yona kutsi Ilapha, kulelozinga lelingetulu kwemvelo.

¹⁷⁰ Ngabe bakhona bantfu kulesakhiwo lapha, lo—lowatiko kutsi angati kutsi yini lengalungi ngawe, noma ungubani na? Phakamisani tandla tenu, uma bakhona. Bantfu kulesakhiwo, lowatiko kutsi angikwati, phakamisa sandla sakho nje. Yebo, mnumzane. Ngiyacabanga ku—kukuyo yonkhe indzawo. Kulungile.

¹⁷¹ Manje, iNkhosi, kukuWe, Nkhosi. Manje nguloko kuphela lengingakwenta. Futsi, Babe, Nkulunkulu, ngikhulekela kutsi Utosipha kona, kutsi labantfu laba bangahle, emizuzwini lelishumi lelandzelako, labanengi bagijimela e-altari, netinhlitiyo tabo ticicicima, kubona. Vula emehlo abo, Nkhosi. Akutsi...

¹⁷² Vula emehlo abo njengalabo lebebaya e-Emawuse. Bahamba naWe lusuku lonkhe futsi bangakwati Wena. Kodvwa ngesikhatsi Wente intfo letsite lebebatu kute umuntfu lomunye lobekangayenta ngaphandle kwaKho, bacondza kutsi kwakunguWe. Loko kwakusemvakwekuba Sewufile, wangcwatjwa, waphindze wavuka futsi.

¹⁷³ Manje, Babe, phani intfo lefanako kulolusuku, emkhatsini walabantfu laba. NeliBhayibheli latsi, “Labatsatfu bayoba ngufakazi.” Ngako ngiyakhuleka, Nkulunkulu, kucinisekisa kutokwentiwa manje ekuseni, ebukhoneni bebantfu, ngaphandle kwekuletfwa ngembili. Konkhe kusemseni waKho, akwenteke, Nkhosi, ngiyakhuleka, ngenca yaJesu, nangeliGama laJesu. Amen.

¹⁷⁴ Ngiyati kutsi lona ngumzuzu lokhatsatako wenu. Kutsiwani ngami na? Kodvwa lengikushumayelako, ngiyakholwa. Lengikushumayelako, ngiyakuphila; ngemusa waNkulunkulu, ngiyakuphila. Nkulunkulu abe nami, kutsi angisite, kute nati kutsi angitisho letintfo leti ngekhatsi kwami. Emehlo akho avulekile, futsi utsi, “Yebo-ke, bengimati uMnaketfu Branham sikhatsi lesidze. Ngikubonile loku. Kodvwa ngiyanitjela, akunandzaba kutsi ungubani, angahle abe yindvodzana yaCharles Branham, noma lokunye kanjalo, kodvwa ngati intfo yinye, Nkulunkulu wenta lokutsite ngaye.” Khona-ke bukani Nkulunkulu. Ningabuki lomuntfu. Nkulunkulu akafuni kungikhombisa; Ufuna kutibonakalisa Yena lucobo. NguYe. Manje uma umbono utofika nje!

¹⁷⁵ Naku. Dzadze Snyder... Ngi—ngitama kubuka khashane naloko, niyabona. Futsi, Nkulunkulu, bani nesihawu.

¹⁷⁶ Nayi indvodza ihleti khona lapha. Lombono usetikwayo, ingibuka ngco. Ngiyacabanga ngisihambi kuwe. Utama kususa umkhuba, awunjalo na? [Lomnaketfu utsi, “Ngitama kususa lomkhuba, mnumzane.”—Umhl.] Kuyekela kubhema bosikilidi,

nguloko lotama kukwenta. Ngabe kunjalo na? Phakamisa sandla sakho uma loko kunjalo. Cha, ngicondze kutsi lensizwa lehleti emuva *lapha*. Angikwati. Sitihambi, ngabe kunjalo, emkhatsini walomunye nalomunye na? Uma kunjalo, jikitisa sandla sakho *kanjena*. Ngabe nguloko impela lobewukhuleka ngako ngalesosikhatsi na? Kulungile.

¹⁷⁷ Uyakholwa na? Yini leyenta loko na? Utsintseni na? LiBhayibheli lasho, kutsi, “UngumPhristi loMkhulu lonekuvelana nebutsa katsaka betfu.” Akazange angitsintse. Angikaze ngiyibone lendvodza. Kodywa utsintse Khristu, Lolapha, naKhristu wasebentisa tindzebe tami nemehlo, kutsi ngikhulume.

¹⁷⁸ Uphakamise tandla takho, nsizwa. Ngiyakubona usolo ubambe tandla takho. Uyangikhola kutsi ngingumprofethi waNkulunkulu na? Ungakwemukela loko lengikutjele kona na? Uma bewungaba nekukholwa futsi ukholwe! Ucabanga kutsi empeleni utosindziswa na? Intfombi yakho lengumngani, ukhuleka mayelana nayo, akunjalo na? [Lomnaketfu utsi, “Liciniso lelo.”—Umhl.] Uh-huh. Ufuna aphiliswe, naye, awufuni yini? Uma loko kunjalo, sukuma ume ngetinyawo takho. Wena! Kunjalo, akunjalo na? [“Yebo, mnumzane.”] Manje bani nekukholwa kuNkulunkulu, futsi nitokwemukela. Ngisihambi kuwe, nsizwa. Angikaze ngikubone. Ngabe sitihambi na? Phakamisa tandla takho totimbili, etulu, uma sitihambi. Angikaze ngikubone emphilweni yami; awukaze ungibone. Manje ngubani... Ningahlala phansi manje, futsi nemukele loko lenikucelile. Kukholwa kwenu kuniphe kona.

Niyakholwa na?

¹⁷⁹ Bekulihlaya esikhashaneni lesendlulile, bekungesilo, dzadze na? Kodvwa akusilo lihlaya manje. Bengati kutsi iNkhosi itokwenta loko, noma ngicabange kutsi Itokwenta. Nkulunkulu angeke kudlalwe naye. Unguye sibili. Uma ungakholwa!

¹⁸⁰ Nangu wesifazane lohleti emuva ngco ngalapha. Ukhulekela lomunye umuntfu. Lowesifazane unesimo sekwfetfuka. UliKhatolika, ngekukholwa. Kunjalo. Uhlala eMgwacwensi iMeigs, akahlali khona na? Uma loko kunjalo, phakamisa sandla sakho, dzadze. Kulungile. Uyakholwa na? Khona-ke yemukela loko lokucelako, uma ungakholwa.

¹⁸¹ Kutsiwani ngawe emuva lapho na? Lomunye akatfole i... A—awukakhweshi kakhulu emuva. Khristu wati kahle impela lapho uhleti khona. Ngikuphonsela insayeya, eGameni laJesu, kutsi ukholwe manje. Ulapha. UMoya waKhe ulapha. Emandla aKhe alapha.

¹⁸² Naku kuhleti indvodza ihleti emuva laphaya, ingibuka manje. Ifake thayi loluhlata satjani, isudu lempfunga, kanjalo. Uyakhuleka naye. Ufuna kuphiliswa eluhlobeni lolutsite lwenkhatsato yesisu, timo tekucumba esiswini sakhe netibilini.

Kunjalo. Wena lohleti emuva lapho. Ake ngikutjele kutsi ungubani. Bewukudokotela itolo, futsi ukuhlolile. Kunjalo. Angikwati, uyakwati loko, kodvwa Nkulunkulu uyakwati. Kukholwa kwakho kukusindzisile, mnumzane. Akadvunyiswe Nkulunkulu lophilako!

¹⁸³ Lodzadze lohleti emvakwakhe ngco, elayinini lelilandzelako, cishe lamatsatfu, emuva ekhatsi lapho. Lapho, ukhulekela maketala wakho, simo sekukhubateka. Uma utokholwa, kulungile.

¹⁸⁴ Kukhona umfo lomncane lohleti lapho, nesandla siphakeme emlonyeni wakhe, angibuka, emuva le ngasemuva. Ubeke sandla sakhe emlonyeni wakhe. Uyakhuleka. Kunemoya lodzabukisako lomtungeletile. Wesula emehlo akhe. Ngingenta nje, insizwa. Ikhulekela umuntfu lotsite. Leso sihlobo sakhe. Lendvodza beyisolo isesibhedlela. Ngumfo lomncane. Ngusibali, simo sekwfetfuka, sesimo sengcondvo. Kunjalo, mnumzane. Uneukholwa, naNkulunkulu utokusebentelela kona.

¹⁸⁵ Ngiphonsela kukholwa kwakho insayeya kuKhristu. NiyaMkholwa na? [Libandla litsi, "Amen."—Umhl.] Ngabe loko kutsatfu na? O, ku... Loko kungetulu kwaloko, akunjalo na? Manje niyakholwa na? ["Amen."] Ngabe kukholwa kwakho sekucatululiwe na? Ngabe inhlitiyo yakho seyivuliwe na? Phakamisani tandla tenu, uma inhlitiyo yenu seyivulekile. Ngabe umnyango uvuliwe na? ["Amen."]

Khona-ke asikhotsamise tinhloko tetfu.

¹⁸⁶ Nkhosi, sondzela manje, Jesu lobusisiwe. O Nkulunkulu, ngiyaKubonga, Babe, kutsi Uphe letibusiso leti. Kutsi bona, bantfu labakhona manje, batokwati kutsi bekungesiyo inceku yaKho. BekunguNkulunkulu waseZulwini, Losihloniphile manje ekuseni ngekuta emkhatsini wetfu, futsi wavumela lokunjena kutsi kwentiwe. Kufakazela kulesitukulwane lesi sebeTive, ngaphambi kwekutsi sesulwe emhlabeni, kutsi UnguMesiya. UyiNkhosi Nkulunkulu waseZulwini. Ulapha, O Nkhosi.

¹⁸⁷ Ngiyacela, ngiKucela kutsi unikete lokukodvwa kwetfuka lokukhulu kulabantfu laba, njengoba kwakunjalo, noma kuvula kucondza kwabo, ngoba batohamba bangene etonweni tabo uma behluleka kukholwa kuWe futsi bavume kungabata kwabo nekungakholwa. Kwangatsi kungafika sibusiso lesinjalo kubantfu, njengamanje, kutsi batokwati kutsi Moya loyiNgcwele ukhona, nekutsi Uyavuma nje kubaphilisa, njengoba Atophilisa noma ngubani. Kuncike ekutseni, "Uma ungakholwa, konkhe kungenteka." Nkhosi, siphe kona. Futsi kwangatsi emandla aKho ekuphilisa angatsanyela phansi etinhlitiyweni tebantfu, njengamanje, futsi aphilise ngamunye wabo. NgiyaKubonga, Nkhosi.

¹⁸⁸ Uma Sathane angena njengelibhubesi lelibhodlako, uMoya weNkhosi wenyusa lizinga kumelana naye, futsi umehlule, Sathane lomkhulu lotisho kutsi unguLowo lomkhulu. Kodvwa iNkhosi yetfu Jesu nguYe lomkhulu, Yena naBabe Nkulunkulu.

¹⁸⁹ Futsi ngiyakhuleka, Nkhosi, kutsi njengamanje, ngaMoya waKho, kutsi Utohamba udzabule etetsamelini futsi upholise wonkhe umuntfu. NgeliGama leNkhosi Jesu siyakucela. Amen.

¹⁹⁰ Uyakholwa kutsi upholisiwe na? Uyakukholwa loko, ngemivimba yaKhe na? Ngabe ikhona intfo lesimiswe phansi enhlitiyweni yakho na? Unemasenti langemashumi lamabili nesihlanu latokwenta uhambe kulesakhiwo na? Unaso na? Phakamisa sandla sakho. "Nginako. Kukholwa lokucinile. Anginandzaba kutsi kutsatsa sikhatsi lesidze kangakanani, kutsi tinsuku letingakhi, kutsi mangakhi ema-awa. Nginemandla ekutsenga ekuphilisa kwami khona manje, futsi ngitohamba ngisuka kulesakhiwo, khona manje, njengalokufanako ngatsi bengiphilile ngalokuphelele." Ungabanjalo, uma ungasukuma ume ngetinyawo takho. Ningahle ningabi njalo; ningahle ningabi njalo, emaviki. Angati. Kodvwa nitobanjalo, uma ninekukholwa kutsi nikukholwe. Nkulunkulu ukukholwa. Mkholwe ngayo yonkhe inhlitiyo yakho.

¹⁹¹ Manje tivalele wena nje naNkulunkulu, manje. Manje nje cala kanje, "Nkhosi, ngiyakholwa. Nkhosi, ngiyakholwa. Konkhe kungabata kwami kungewatjwe eMtfonjeni. Nkhosi, ngiyakholwa. Msindzisi, vusa lukholo lwami kuWe, luze lususe intsaba. O Nkhosi, Ungaba neliphutsa na? Ungeke waba neliphutsa. Kucala, uma uMnaketfu Branham angenayo ngisho nayinye intfo kutsi ayisho, Livi laKho lasho njalo. Khona-ke, ngemusa, Uvumele uMnaketfu Branham kutsi abuke etikwalesakhiwo kubantfu labanengi, kwenta intfo lefanako Lowayata ngesikhatsi Uhamba eGalile. Uma ngibe nekungabata enhlitiyweni yami, Nkhosi, khona-ke kususe, ngaphambi kwekutsi lusuku lwami luphele. Ngingakabitwa, kutsi ngiphendvule ekwaHlulelweni, ngisuse sono sami sekungakholwa. Futsi ngente ngibe waKho khona manje. Angibe waKho." Nkulunkulu akubusise, ngumkhuleko wami. Nalabo...

¹⁹² Manje nisakhuleka, nivalelwwe naNkulunkulu, bekunalabo labaphakamise tandla tabo, labobebefuna kuhamba naNkulunkulu, bebefuna kuvula tinhltiyo tabo kuYe. I-altari seiyivuliwe manje, mngani wami. Beningamema ngamunye wenu kutsi ete lapha e-altari futsi aguce phansi, futsi atsi, "Nkhosi Jesu, bani nesihawu. Ngifuna Wena ungene enhlitiyweni yami. Nyakatisa konkhe kungabata kwami. Nyakatisa konkhe kwesaba kwami. Nyakatisa bugovu bami. Khipha yonkhe intfo, futsi Ungene. Ngena enhlitiyweni yami

futsi ube yiNkhosi. O, ngikholwa kutsi UnguMsindzisi wami, kodvwa Awukaze ube yiNkhosi yami.”

¹⁹³ Nkulunkulu akubusise, mnaketfu. Ligama lalendvodza lena nguDavis. Uvela eVirginia. Ulapha kutsi ayekele umkhuba wekubhema, kanye neligcubu lalibamble enhlitiywani yakhe ngalotsandziwe wakhe kusukela asemnacane. Nguloko lakutele e-altari, manje ekuseni.

¹⁹⁴ Manje wotani. Nimenywa kutsi nihambe niye e-altari manje. Guca phansi lapha embikwaKhristu waNkulunkulu. Ningalicapheli lelitabernakeli lelincane lelifobekile. Caphelani kutsi Ngubani losekhatsi lapha, manje ekuseni, uMsindzisi wetfu lobusisiwe. Ungeta na? Uyamenywa. INkhosi Jesu ikulindzele kutsi ute, ngoba wonkhe (lohlantako) umoya kutsi uphume enhlitiywani yakho.

...Bantfwana bakhe labatsandzekako kanye naye.

Labanye bendlula emantini, labanye bendlula kuzamcolo,

Labanye ngemlilo, kodvwa bonkhe ngeNgati;

Labanye ngelusizi lolukhulu, kodvwa Nkulunkulu uniketa liculo,

Yenyuka, manje ekuseni, uguce phansi eBukhoneni baKhe.

Nkulunkulu uhola bantfwana baKhe labatsandzekako ngekuhambisana;

Ngaletinye tikhatsi esigodzini ebusuku lobumnyama kunabo bonkhe,

Nkulunkulu uhola bantfwana baKhe labatsandzekako ngekuhambisana.

Labanye bendlula emantini, labanye bendlula kuzamcolo,

Labanye ngekuvivinywa lokujulile, kodvwa bonkhe ngeNgati;

Labanye ngelusizi lolukhulu, kodvwa Nkulunkulu uniketa liculo,

Ngesikhatsi sasebusuku kanye nasebudzeni belusuku.

Labanye bendlula emantini, labanye bendlula kuzamcolo,

Labanye ngekuvivinywa lokujulile, kodvwa bonkhe ngeNgati;

Labanye ngelusizi lolukhulu, kodvwa Nkulunkulu uniketa liculo,

Ngesikhatsi sasebusuku kanye nasebudzeni belusuku.

Noma buhlungu busehlela, naSathane emelene
 natsi,
 Nkulunkulu uhola bantfwana baKhe
 labatsandzekako ngekuhambisana;
 Ngemusa singancoba . . . ? . . .
 Nkulunkulu uhola bantfwana baKhe
 labatsandzekako ngekuhambisana.

Ungeke waMvumela akuhole na?

Labanye bendlula emantini, labanye bendlula
 kuzamcolo,
 Labanye ngemlilo, kodvwa bonkhe ngeNgati;
 Labanye ngelusizi lolukhulu, kodvwa
 Nkulunkulu uniketa liculo,
 Ngesikhatsi sakusihlwa kanye nasebudzeni
 belusuku.

¹⁹⁵ Manje uyamenywa, njengoba sihlabela; uma Nkulunkulu
 anconcotsa enhlitiywani yakho, kutsi akuvumele uvule inhlitiyo
 yakho, kubona Bukhona baKhe, kujabulela tibusiso taKhe
 ayiNkhosi yakho, umbusi wakho. Ningete nakhohlwa nje kutsi
 nisekhatsi kulelitabernakeli lelidzadlana na? Futsi nenyukele
 lapha eSihlalwani sebukhosi semusa waKhe, futsi niguce
 phansi nalaba labanye bantfu labakhala, futsi uvule inhlitiyo
 yakho, kute Avule kucondza kwakho, kutsi utoba ngumntfwana
 waKhe futsi uMkhonte. Kanye futsi siyahlabela, livesi lekugcina
 lalengoma. Niyamenywa. Manje wotani.

Kudze neludzaka, futsi kudze nelubumba,
 Nkulunkulu uhola bantfwana baKhe
 labatsandzekako ngekuhambisana;
 Khashane etulu enkhatimulwani, esukwini
 lwaPhakadze,
 Nkulunkulu uhola bantfwana baKhe
 labatsandzekako ngekuhambisana.

Labanye bendlula emantini, labanye bendlula
 kuzamcolo,
 Labanye ngekuvivinywa lokujulile, kodvwa
 bonkhe ngeNgati;
 . . . kodvwa Nkulunkulu uniketa liculo,
 Ngesikhatsi sakusihlwa kanye nasebudzeni
 belusuku.

Kancane.

Labanye bendlula emantini, labanye bendlula
 kuzamcolo,
 Labanye ngemlilo, kodvwa bonkhe ngeNgati;
 Labanye ngelusizi lolukhulu . . . (Anicondz
 na?) . . . liculo,
 Ngesikhatsi sakusihlwa kanye nasebudzeni
 belusuku.

¹⁹⁶ Ngekuhlonipha sikhotsamisa tinhloko tetfu manje eBukhoneni beNkhosi lenkhulu yenkhatalimulo, iNkhosana lenkhulu yekuthula. Sibonga kakhulu kanjani kutsi nivuse tinhlitiyo tenu tivulwe kuloMoya lomkhulu lokhona manje. “Loyo lota kiMi, Angiyuze ngimlahlele ngephandle.” Akunandzaba kutsi tidzingo takho tiyini. “Noma yini tintfo lotifisako uma ukhuleka, kholwa kutsi uyatemukela, futsi utoba nato.” Nkulunkulu usentela loku.

¹⁹⁷ Manje, bantfwana, njengoba nisesakhiweni, nomakuphi, khotsamisa inhloko yakho nje. Hloniphani sibili umnaketfu asakhuleka, futsi nitokwemukela loko lenikucelile. INkhosi inibusise ngalokuchichimako manje, lapho lodzadze asachubeka nekuhlabela kwakhe, kancane manje. [UMnaketfu Neville uyakhuleka—Umhl.]



NGIME EMNYANGO FUTSI NGIYANCONCOTSA SSW57-1208
(I Stand At The Door And Knock)

LoMlayeto ngeMnaketfu William Marrion Branham, kwekucala wetfulwa ngesiNgisi ngeliSontfo ekuseni, ngenyanga yeNgongoni 8, 1957, eTabernakeli laBranham eJeffersonville, eIndiana, eU.S.A., utsatselwe ekucopheni kwetheyiphu lenamazibuthe futsi wakhicitwa ungakafinyetwa ngesiNgisi. Loku kuhunyushwa ngeSiSwati kwakhicitwa kwakhishwa yiVoice Of God Recordings.

SWATI

©2023 VGR, ALL RIGHTS RESERVED

VOICE OF GOD RECORDINGS, SOUTH AFRICA OFFICE
58 DISA ROAD, ADMIRAL'S PARK, GORDON'S BAY 7140 WESTERN CAPE
REPUBLIC OF SOUTH AFRICA

VOICE OF GOD RECORDINGS
P.O. Box 950, JEFFERSONVILLE, INDIANA 47131 U.S.A.
www.branham.org

Inotsisi yelilungelo lemtsetfo

Onkhe emalungelo agodliwe. Lencwadzi ingaprintwa ngeprinta yasekhaya yentelwe kutsi umuntfu atisebentisele yena noma kutsi iniketwe labanye, mahhala, njengelithulusi lekusabalalisa liVangeli laJesu Khristu. Lencwadzi akukamele itsengiswe, iphindze ikhicitwe tibetinengi, iposwe kuwebsayithi, igcinwe ngeluhlelo lwekutsi iphindze itfolakale, ihunyushelwe kuletinye tilwimi, noma isetjentiselwe kuticelela timali ngaphandle kwemvumo lebhaliwe lecondzile ye Voice Of God Recordings®.

Mayelana nelwati lolwenetiwe noma lwalwenye impahla lekhona, sita uchumane ne:

VOICE OF GOD RECORDINGS
P.O. Box 950, JEFFERSONVILLE, INDIANA 47131 U.S.A.
www.branham.org